

D E
L U C I S
N A T U R A
E T
P R O P R I E T A T E.

Auctore
I S. V O S S I O.



A M S T E L O D A M I,
Apud Ludovicum & Danielem Elzevirios.
c 1 3 1 3 c l x i i i . /

APRIL 1901
J. H. D. R. S. M.
J. H. D. R. S. M.
J. H. D. R. S. M.



SERENISSIMO PRINCIPI,

CAROLO LVDOVICO,

DEI GRATIA COMITI PALA-
TINO AD RHENVUM, S. ROM.
IMP. ELECTORI, ARCHI-
THESAVRARIO, DVCI BA-
VARIÆ, &c.



T nihil in oculis luce cla-
rius, ita nihil causis & natu-
ra ejus intellectui obscurius
esse apud omnes in confesso
est, Princeps Serenissime.
Cum enim cætera objecta
quæ sensus movent, brevi
admodum intervallo & paucis duntaxat distent
millibus, solum lumen ab infinitis, ut sic di-
cam, extra orbem spatiis ad visum adpellit,

D E D I C A T I O.

imperceptibili tempore, & quod magis mirandum modo rectis, modo curvis, aliquando fractis, aliquando percussis, nonnunquam etiam incisus & duplicatis radiis. Movit tam insolitum spectaculum multorum ingenia, ut in lucis naturam & proprietates diligentius inquirerent; sed quod papilionibus dum flammam sectantur, idem fere curiosis istis naturæ scrutatoribus evenit, si enim non perire, saltem de iis vere dici possit, eos non lucis claritatem, sed tantum ingenii sui tenebras prodidisse & semetipsos excæcasse dum solem atramento suo inficere fuere conati. Idemne nos maneat fatum dum nonnullas lucis facultates explicare conamur, eorum esto iudicium, quorum mentes benigniore cælestis lampadis fulgore illustrantur. Si non ubique scopum simus adsecuti, si alicubi erraverimus, culpam non deprecamur, imo etiam laudem & gratiam speramus, dummodo in cæteris propius à veritate absimus, quam plerique ii, qui stylum & ingenium ante nos in eodem posuere argumento. Quamvis vero, Princeps magne, pro insigni tua erga me benevolentia, exile & minutum possit videri quod reddimus munusculum, vel solus tamen lucis titulus non promittit tantum, sed etiam spon-

DEDICATIO.

spondet aditum facilem, nec metuimus ut rerum pulcherrima & jucundissima, sine qua ne mundus quidem constare potest, morosi janitoris repulsam patiatur. Cum omnia bona & præclara admittas & diligas, abest quam longissime ut lucem velis excludere. Quod si forsitan fallimur, & pro die noctem, pro luce umbram obtrudere videamur, ipse mihi silentium lubens imperabo, nec sequar illorum exemplum qui culpæ quærere patronum, quam culpa vacare maluerunt, quasi non sufficiant errores in quibus vulgo versamur, nisi in cumulum accedant etiam illi qui indies committuntur, ac si vitæ interesset ut sit aliqua errorum doctrina & scientia. At vero si non decipimur, & non inepte videmur ista quæ offerimus conscripsisse, utique non est ut censuram metuamus, aut ut cunctemur illa ipsa, qualiacunque demum sint, Tibi maxime Principum, consecrare, cujus fulgidum nomen non nobis tantum, sed & ipsi quoque luci lucem possit scænerare. Benigna itaque fronte novellum hunc ingenii nostri foetum suscipe, magne literarum Patrone; si illum manu obstetricia contigeris, nec dentem, nec aspectum formidabit malignum. Quod si etiam in eruditis tuis oculis gratiam & favorem invenerit,

D E D I C A T I O.

non est quod diem atrum aut oblivionis aquas
pertimescat. Tua luce perfusus & amictus adeo
nitens & splendidus sibi videbitur, ac si lava-
cro Auroræ aut fonte solis lotus emerisset. Deus,
Serenissime Princeps, in gloriam ævi præsentis &
exemplum secuturi incolumem Te quam diu-
tissime servet.

Hagæ Com. cIdo Id cLXI.

Serenissimæ Cels: V^a

devotissimus

ISAACUS VOSSIUS.

B E-

BENEVOLO LECTORI.



*Um multi ingenio & doctrina præclari vi-
ri diligenter & fuscè admodum scripserint
de eo quod hic exhibemus argumento, ari-
di & jejuni forsàn videbimur, quod brevi-
ter & cursim adeo stringamus rem omnium nobilissi-
mam, qua nulla in rerum natura latius patet, cum
lucis plena sint omnia, solaquè propemodum sit quæ to-
tam rerum naturam amplectatur. Sed cum ea saltem
pertractare proposuerim, quæ alii prætermiserunt, aut
non satis accurate tradidere; spero me nullam incur-
surum reprehensionem, si non omnia simul exhausero;
nec brevitatem, ut puto, carpes, LECTOR CAN-
DIDE, dummodo in ea aliqua invenias vel necdum
dicta, vel clarius demonstrata quam ab aliis factum
sit hætenus. Nulla est fere veritas aut cognitio, quæ
tota simul adfulgeat. Videt hæc ætas quod non vide-
runt majores nostri, sed multo plura cognoscent illi,
qui post nos futuri sunt, præsertim si honor habeatur
artibus & ingenia excitentur. Nos etiam, si vita &
otium suppetat, non pauca, ut spero, discemus, quæ
nunc nescimus, & forsàn de his ipsis plura & certiora
aliquando exponemus, si aliæ curæ permiserint, ut quæ
in physicis exorsissimus, ad umbilicum detur perduce-
re. Interim non displicituros tibi confido, quos hic vi-
des*

des conatus, qui si non ob aliud, at saltem novitate placebunt. De ortu & natura ignis & caloris, de numero elementorum, aliaque quae leviter hic attigimus, uberius agemus in Meteorologicis nostris. Ne autem te offendat quod radiorum nonnunquam utar vocabulo ex communi consuetudine, cum non ex lineis aut particulis compositum sit luminis profluvium, sed unum & continuum constituat systema. Si vel hoc vel aliud quidpiam sit quod displiceat, Tu, mi Lector, benigna interpretatione succurrito; quod si difficilis sis & refractarius, pleniorē à nobis explicationem exspectato.

ISAA-

ISAACI VOSSII
DE
NATURA ET PROPRIETATE
LUCIS.

CAPUT I.

Causam & subiectum lucis esse ignem.

DE luce dicturi expedit ortum & causam
ejus ostendere. Causa & subiectum lu-
minis est ignis. Ab hoc itaque incipien-
dum. Licet vero hic multis modis fiat,
omnes tamen isti modi ad unum redu-
cuntur, ad constipationem nempe &
adtrititionem materiæ solidæ. Nam si dixerimus ignem
etiam generari ex-propagatione, ut cum igne ignem pa-
ramus & accendimus, aut ex collectione radiorum, ut
fit speculis comburentibus, jam ignis natalem non ex-
plicamus, sed saltem modum ostendimus quo ignis seu
calor jam existens multiplicari & propagari possit. Al-
tius itaque repetendus est ignis ortus, & indicanda ratio
quo pacto ignis nascatur ubi nullus vel ignis, vel calor,
vel lux præexistit. Hoc autem aliter non contingit,
quam sola compressione seu attritione. Cum enim non
possint duo corpora esse in eodem loco, necessario eve-
nit, ut quando illa comprimuntur & se mutuo penetra-
re conantur, oriatur calor & dein ignis. Minor com-
pressio efficit calorem, vehementior vero collisio & at-
tritio ignem suscitatur. Is vero est velut actus inaniens &
evacuans nimiam constipationem, & hoc quidem pacto
ipsa sibi succurrit natura.

A

Vulgo

Vulgo credunt ignem, qui ex attritione seu filicum seu alterius materiæ inflammabilis compressione provenit, fieri ab attenuatione aëris. Sed vero aër quantumvis attenuetur & rarefiat, nunquam tamen incalescet, quin potius hac ratione frigeſcit. At vero si actum hunc consumentem & succurrentem naturæ laboranti, non ex rarefactione aëris, sed ex nimia constipatione & condensatione corporum fieri statuamus, jam & oculis & sensibus satisfiet.

Quamvis autem ignis etiam in fluido corpore possit existere, vix tamen illic nasci aut oriri potest. Ut enim solida corpora motu incalescunt, ita fluida quanto magis moveantur & se mutuo penetrare conentur, tanto magis frigeſcunt. Non enim probo quod vulgo dicitur, ex collisione corporum fluidorum, cujuscmodi sunt nubes, ignem gigni posse. Fulminis flamma non fit à collisione nubium, sed consumto & depaſto ab igne, illo qui intercedit aëre, tum demum fit collisio & fragor. Ignis ergo origo necessario præsupponit materiam solidam, non fluidam vel raram, quæ vi propria ignem concipere non potest, nec aliunde conceptum diu nutrire.

Cum vero primaria ignis sedes sit Sol, valde fit verisimile substantiam Solis esse solidissimam, & quidem tanto terrestri materia solidiorem, quanto ignes ejus magis sunt vehementes & diuturni, ita ut non immerito Democritus Solem massæ ferri candentis olim compararit.

C A P U T II.

Ignem non esse corpus.

CUm ignis nihil aliud sit quam calor intensus, productus à constipatione & attritione corporis solidi
& in-

& inflammabilis, non recte sentiunt illi, qui ignem corpus esse putant. Ignem nempe vocant compositum id, quod ex materia ac flamma depascente constat; sed hoc perinde est ac si animam corpoream vocaremus, quod corpori inserta sit ac permixta. Scorsim itaque considerandus est ignis, & separandus à materia cui inhæret; id si fecerimus, cognoscemus ignem per se non subsistere, perit enim sublato subjecto, à quo abstrahi non potest nisi sola cogitatione. Non est ergo corpus.

Aliter colligunt qui ignem elementum vocant. Nempe id ex eo evenisse credibile est, quod cum Solem non consumi nec minui censerent, perennem ejus fecerint materiam. Hac persuasione credo adductos fuisse eos, qui ignem simplicibus corporibus annumerarunt, ac quarum inter elementa locum dedere. Sed vero crebra phenomena evincunt, ne cœli quidem orbis esse mutationis expertes, ac æque corruptibili constare materia, atque hæc nostra tellus. Complures in Solis disco maculæ, aliæ aliis lucidiores, quædam nascentes, quædam pereuntes, clare satis ostendunt, etiam hujus flammæ egere pabulo, sive illud foris accedat, sive è visceribus prorumpat. Ut itaque elementum fiat ignis, necesse est ostendere ignem aliquem, qui alimento non egeat, qui non adurat nec calefaciat, quique non sit in aliquo subjecto. At vero talis nec in nostro, nec in aliis cœli orbibus reperitur, ut opinor. Frustra itaque dicitur ignem esse vel corpus, vel elementum.

Non recte quoque ex levitate ignis sive flammæ argumentum colligunt, quia nempe omne quod leve sit, idem quoque sit corporeum. Ignis neque levis est, neque gravis, cum sit actus dissolvens corpora. Quia vero corpora cum dissolvuntur & dilatantur fiunt leviora,

necessario sursum tendunt, avolantem materiam sequitur & intercipit flamma. Non tamen omnem flammam sursum tendere clare evincunt fulmina. Sed & artificialis etiam reperitur pulvis ex auro conflatus, qui deorsum mittat flammam si accendatur. Notissimum præterea per lucernæ extinctæ fumum, si alterius lucernæ flammam eontingat, deorsum flammam devolvi. Clarum itaque ignem non habere pondus, sed sequi motum & impulsus corporis cui inhæret.

Sed neque ex eo, quod luce & calore corpora dilatentur, ullum peti debet argumentum unde lucem & calorem corpus esse adstrui possit. Actio enim illa lucis & caloris nihil addit corporibus, sed corpora ipsa ex potentia suæ substantiæ dilatantur, & non quoad ipsam materiam, sed saltem quoad extensionem materiæ augentur.

C A P U T III.

Quid sit lux.

CUM varix sint lucis proprietates, utpote quæ non luceat tantum, sed & calefaciat, & colorem inducat, rerum imagines deferat, situm corporum mutet, nonnunquam etiam vitam largiatur; non mirum est pro diversa ejus facultate diversis quoque modis definiri naturam ejus. Quia vero unicam ejus proprietatem, nempe qua luceat, considerabimus, sic illam definiemus, ut lux sit actus corporis lucentis, per quem quidquid visibile est cernimus.

Non recte vero lucem à lumine distinguunt, ac lucem ponunt in corpore lucente, lumen vero extra. Lux non potest esse visibilis nisi in corpore pellucido, ignis vero non est pellucidus: Pro ratione enim sulphuris qui est in singulis corporibus, tinguntur quoque flammæ,
ideo-

ideoque opacæ fiunt: nam omne coloratum est quoque opacum. Si fieri posset ut in medio magnæ alicujus flammæ versaremur, nihil cerneremus. Distinguenda est itaque lux à flamma & igne, lumen vero à luce non est distinguendum.

Jam vero cum ignis sive flamma non sit corporea, multo minus lumen potest esse corporeum. Scio quidem complures & olim fuisse, ac nunc etiamnum esse, qui aliter de lumine sentiunt, ac radios ejus ex corpusculis compositos esse pertendunt: sed ut cognoscamus, quid de tota hac re sentiendum sit, argumenta, quamobrem sic crediderunt, exponam.

C A P U T IV.

Exponitur & examinatur Cartesii de luce opinio.

PRimum itaque excutiemus opinionem Renati Cartesii, quam in Physicis suis principiis & alibi adstruere est conatus. Tantum nomen tantamque auctoritatem vir ille scriptis suis consecutus esse videtur, nostris præsertim in oris, ut pleraque ejus dicta pro demonstrationibus pene habeantur, publiceque libri ejus tanquam veritatis indices in scholis & academiis quibusdam prælegantur. Cum à paucis postulatis & communibus valde notionibus Philosophiam suam auspicatus sit, in progressu tamen operis nemo plura adsumsit, & quidem talia, quæ nec ab ipso demonstrata sint, nec demonstrari à quoquam possint, etiam si vim intellectui inferamus. In eo præcipue callidus fuit, quod cum tam plana & perspicua præmittat principia, mox tamen iis relictis alia promat, quæ neque visû, neque sensu percipi possunt, globulos scilicet, particulas striatas, & elementa invisibilia.

bilis. Illis positis, non probatis, incipit philosophari : quia nempe ubi oculi & sensus deficiunt, illic fingendi incipit libertas. Sed vero inquiunt perinde esse qualiacunque statuantur principia, dummodo per illa rerum adparentium ratio dari possit. At vero quamvis hoc nequaquam concedendum videatur, utut tamen concedatur, nihil etiamnum efficitur. Adeo vero longe abest ut positis invisibilibus istis principiis causæ rerum pateant, ut ne vel unum saltem phænomenon horum beneficio recte explicari possit. Breviter sententiam ejus de origine & natura luminis, cui tota ejus Physica tanquam fundamento nititur, examinabimus. Is itaque ut mundum, sic quoque materiam aliquam statuit primam, non finitam, non infinitam, sed indefinitam. Hanc materiam, cum omnia spatia occuparet, neque enim vacuum posse dari in rerum natura, à Deo contractam fuisse dicit in minutissimas particulas. Omnes vero istas particulas initio fuisse æquales, sed Deum deinceps indidisse iis motum constantem & perennem. Hinc factum esse ut rotundam induerint figuram. Dum vero sic tornantur, ne vacuum pateretur natura, scobem & ramenta harum particularum occupasse intermedia spatia. Ex hac circinatione vero etiam alia corpuscula provenisse fingit, qualia nempe sunt lignorum, quæ dolantur, præsegmina; Hæc ipse vocat corpuscula striata. His ita digestis tria deinde format elementa. Primum elementum vocat scobem & subtilia ramenta; secundum ipsos globulos, tertium vero particulas striatas. Ex primo elemento dicit conflatum esse Solem & vortices cœli, ex secundo cœlum, ex tertio vero, tanquam ex spuma, censet coaluisse maculas solares. Jam vero globulos secundi elementi continua serie à cœlo huc usque extensos

tenfos esse scribit, moveri perpetuo, ac penetrare poros aëris, vitri & aquæ. Quia vero moto uno globulo eodem momento omnes simul moveantur, baculo hanc globulorum seriem comparat, cujus una pars moveri non potest, quin simul quoque moveatur pars altera. Istum vero globulorum motum lucem esse dicit.

Quis non obstupescat tam longa figmentorum catena? Quamvis ostendere hæc, idem possit videri quod destruere, quia tamen non pauci etiam præclari viri hoc nostro seculo reperiuntur, qui imaginariis istis elementis, globulis & particulis striatis ita capiuntur, ut præter istas formas in Physicis nihil sciri posse palam profiteantur; operæ pretium fuerit paucis monere, quibus & se & alios difficultatibus involvant; qui vanis adeo commentis à meliori Philosophia se abduci patiuntur. Primum quis non miretur trina hic statui elementa, cum secundum propriam hypothesin unum tantum agnoscat? Quis unius ejusdemque materię diversas formas, diversa unquam vocavit elementa?

Jam vero cum globulos & corpuscula sua, non ut Democritus inscabilia & solidissima faciat, sed vero longe molliora & quæ secari & comminui in minora possint corpuscula, qui fieri potest ut immensæ istæ globulorum texturæ continua rotatione non sint adtritæ & in pollinem comminutæ? Cur, cum ex eadem qua Sol consistit materia, vicinitate & contactu Solis & fervore motus inflammatæ & combustæ non sunt? Cur vento, aëre & occurfu aliorum corporum non diffiantur & rumpuntur longæ illæ & pertenuæ globulorum catenæ, incertosque ac tremulos nobis efficiunt luminis radios? Sed & hoc quomodo aliquis expedire possit, cum mille discrepantes motus ex discrepantibus locis imprimantur,

tur, motus illos non confundi & contrarios à contrariis non everti? Sane quomodocunque aliquis hanc lucis descriptionem velit construere, quot corpuscula, totidem quoque sunt statuenda miracula. Cum nulla machina movendis infinitis adeo globulis sufficiat, & tamen levissimo impulsu moveri dicantur, fatendum fuerit, ut perennet hic motus, singulis globulis novas accedere potentias quibus impellantur. Cum enim sectilia & fragilia supponantur hæc corpuscula, disrumpentur potius priores globuli, quam ut sequentibus eundem imprimant motum. Utut tamen hæc quantumvis absurda fieri posse admiserimus, at certe illud fieri non poterit, ut Solis siderumque lumen immensum adeo corpusculorum agmen penetret. Vel ipse hic noster aër, si vel paulo fuerit densior & compressior, desinit esse perspicuus, & fit opacus. Plus opacitatis habent corpora solida, ideoque difficilius lumen transmittunt. At vero si corpus aliquod ex pluribus minutis corpusculis diversam habentibus superficiem fuerit compositum, jam desinit esse pellucidum. Viderint itaque qui huic Philosophiæ adstipulantur, quale lucis vehiculum introducere contentur. Etiam si globuli & minuta ista corpuscula constarent ex materia quæ puritate & perspicuitate crystallum & adamantes millies superaret, non tamen radii Solis vel unicam ejus unciam possent perforare.

C. A. P. V.

Gassendi opinio expenditur.

A Liquanto quidem vero similior possit videri opinio Gassendi & aliorum, qui favent doctrinæ atomorum, cum & paucioribus contenta sit postulatis, & non adeo

adeo indeterminatam relinquat lucis naturam; veruntamen cum & hi lumen faciant corporeum & radios ejus compositos esse dicant ex corpusculis aut oblongis virgulis materiatis, non minus à vero recesserunt; ac iisdem quibus priores difficultatibus sese involverunt. Tantum abest ut atomi seu corpuscula istæ causa aut instrumentum lucis esse possint, ut potius sint futura vehicula tenebrarum. Vitrum & alia pellucida quamvis valde fuerint crassa, pervia nihilominus sunt radiis lucis. At verò nulla tam exigua vitri portiuncula possit dari, si eam in atomos, aut saltem in tenuissimum pulverem comminueris, quin statim desinat esse pellucida.

Duas vero potissimum rationes invenio, quibus præcipue se persuasos esse fatentur, ut lucem corpus esse sentiant. Prima quidem hæc adfertur ratio, quod cum lumen iisdem quibus corpora fruatur facultatibus, fluctatur nempe & repercutitur pro ratione materiæ occurrentis, satis exinde verisimiliter possit concludi, ipsum quoque lumen esse corpus.

Altera ratio, qua utuntur, hæc est, quod si quando lumen in pellucidum aliquod corpus, puta aut vitrum aut aquam, incidat, non omnes ejus radii pertranscant, sed aliqui reflectantur. Putant nempe illos radios qui in poros recta dispositos incidunt, illæsos transire; alios vero incidentes in partes corporis pellucidi solidas aut continuas, sursum repelli & repercuti.

Priori argumento facile occurritur; cum & in sono motus iste æque sit manifestus. Nec dubitandum, si animæ aliarumque substantiarum motus forent perceptibiles, quin idem etiam in his posset deprehendi.

Magis itaque urgent sequens Heronis Mechanici argumentum, quod tamen non uno laborat vicio. Nam si

B

radii

radii lucis illac tantum ingrediuntur, qua vitri & aliorum corporum pellucidorum poros recta dispositos inveniunt, jam non certa lege, sed pro ratione & dispositione meatuum dirigerentur, quod adversatur experientiae. Quod si ubique tales occurrant meatus, omnino consequetur, ut vitrum nullas partes solidas habeat. Denique vitrum non erit vitrum, sed tantum corpus adparens. Nam si ubique sint pori, jam necessario consequetur, ut nusquam sit vitrum. Atqui tamen sensus & experientia docent, nullum esse vitri punctum quod non illustretur, quodque non aequali proportionem transmittat lucem: hoc vero qui fieri possit si per poros tantum lux propagetur? vel itaque dicendum lumen non esse corpus, aut admittendum absurdum istud, duo corpora posse simul esse in eodem loco. Illud vero imprimis absurdum, corpus aliquod statuere tot poris pervium, quod tamen sit perspicuum. Ostendatur vel una aliqua materies, sive sit vitrum, sive cornu, sive aqua aut quaelibet alia, quae simul ac poros admittat, simul quoque non fiat opaca. Profecto qui sic argumentantur, illi adimunt non parant lumini transitum, cum nullum corpus eximie porosum radios transmittat. Verum esse quod affirmamus, id multis probari potest experimentis. Si enim quamcunque materiam pellucidam multis perviam feceris poris, desinit esse pellucida. Sed vero si aquam adfuderis & poros impleveris, denuo fit pellucida. Vitrum vetus & arrosus, quale saepe effoditur è terra, candicat aequae fere ac vitrum pistum. Idem madefactum aut aqua mersum, recuperat priorem statum ac fit perspicuum. Hac arte utuntur agyrtæ, ac miseris nonnunquam imponunt emptoribus. Imaginem quamcunque volunt, includunt palæ annuli, eandemque frustulo vitri

ve-

veteris ac albicantis obducunt. Imaguncula non com-
paret si vitrum fuerit siccum, idem vero aqua aut vino
madefactum latentem denuo producit imaginem.

Eadem est natura Onychum quorundam, qui vulgo
Chalcedonii appellantur, qui cum lactei sint coloris, ad-
fusa aqua perspicui redduntur.

Sed & charta & crySTALLUS comminuta & complura
alia porosa corpuscula, si aqua aut oleo adspargantur, il-
lico fiunt pellucida.

Verum quo clarius istæ cognoscamus, haud intem-
pestivum erit, ut arbitror, porro ostendere pleraque cor-
pora pellucida carere poris, nec rerum naturam adeo esse
fistulosam, quam vulgo creditur

C A P U T VI.

*Vitrum, aquam & eximie pellucida corpora carere poris,
& quomodo pori generentur.*

OMne itaque corpus aut fluidum est, aut solidum.
Fluida corpora sunt illa quæ non habent consisten-
tem formam: Solida vero sunt, quæ eundem partium
servant situm, etiamsi moveantur. Dividamus vero soli-
da in simplicia & composita. Simplicia solida sunt illa
corpuscula è quibus composita solida fiunt, & in quæ
viceversa dissolvuntur. Jamvero in confesso est apud o-
mnes talia corpuscula poris carere, si enim non careant
iis, non erunt simplicia, non erunt solida, denique non
erunt corpora. Nam si ne illa quidem interstitia, quæ
meatus separant, sint solida, ubique erunt meatus, ni-
hil itaque in rerum natura erit corporeum. Hoc vero
cum perabsurdum sit existimare, sequitur dari corpuscu-
la physica quæ omnino sint solida.

B 2

Porro

Porro quia hæc coherere sibi invicem non possunt, quin relinquantur multa spatia inania, jungi ideo & conglutinari liquore intercurrente, omnes, nisi fallor, fatebuntur. Liquorem vero illum esse continuum & nullis interceptum meatibus, & hoc quoque certum est. Scio quidem quosdam aquæ & omnibus fluidis poros adtribuere, sed rationes quibus hoc efficere conantur, valde sunt frivolæ. Si aqua non esset continua, sed ex separatis particulis instar arenæ aut farinæ quantumvis minutæ constaret, non adeo esset plana ejus superficies. Aspera & inæqualis fieret, vel simplici contactu. Non præterea aqua aquam sequeretur in siphonibus, si non unum corpus, sed ex diversis constaret corpusculis. Sed neque bullæ, quales à pueris leni spiraculo solent excitari, subsistere possent. Si fistulosus esset humor ambiens, conciderent bullarum latera. Denique si porosa & non continua esset aqua, utique non esset perspicua, ut ex jam dictis & porro dicendis clarum fiet.

Cum ergo partes è quibus corpora componuntur, sint solidæ; superest ut alia etiam sint ipsa corpora, dummodo perfecte ab humore infuso conglutinata fuerint.

Quæret jam aliquis, si humor iste sit continuus, omniaque intermedia spatia impleat, unde ergo pori in corporibus oriuntur? Verum hujus rei manifesta satis est ratio, nempe id sit tam ab externo quam interno calore exsiccante & depascente humorem quo corpuscula connectuntur. Scio quidem aliter quoque excavari meatus, ab insectis scilicet erodentibus, item à materie graviore penetrante & permeante minus gravem; sed vero insecta nulla generantur in metallis, in lapidibus, in vitro aliisque id genus solidis & inanimis corporibus, de qui-

quibus saltem nunc sermo est; altera vero ratio alio pertinet. Nam quod argentum vivum penetret vasa fictilia, lignum, corium, & similia, id nequaquam mirandum. Lignum & corium proprie non sunt corpora solida, cum extendi & dilatari possint. Fictilium vero materies, rarior est quam hydrargyri. Facile itaque penetrat, nec tamen ideo quod fictilia poros habeant, sed quod hydrargyrus pondere suo partes lutj molliores & pene fluidas, aperiat & sic transeat. At vero saxa, metalla aliaque nativa solida, non pervadit hydrargyrus, quia firmiori glutino junguntur. Multo minus crystallum, vitrum, aliaque valde pellucida, quoniam ea non ex corpusculis, sed ex continua & uniformi constant materia.

Cum itaque non pellucida tantum, sive ea liquida fuerint sive solida, sed & omnia fere inanima corpora careant poris in prima origine; clarum est lucem, quæ omnia simplicia corpora pertransit, ut infra docebimus, non posse esse corpoream.


Quod autem aqua, vitrum & similia, non omne transmittant lumen, sed portionem aliquam remittant, ejus rei hæc est ratio, quod omnia corpora quantumvis pellucida, aliquid tamen habeant opacitatis. Quamvis hoc ex jam dictis satis colligi possit, ex iis tamen quæ infra à nobis dicentur, multo patebit clarius.

C A P U T VII.

Radios lucis non esse corporeos.

Sufficere hæc poterant; nisi fallor, ad convincendam eorum sententiam, qui lumen & radios corporibus accensent; quo tamen magis opinionis hujus absurditas adpareat, unum etiamnum adjiciam. Nemo

est eorum, qui hæc legent, qui non aliquando viderit lumen per angustum foramen in cubiculum tenebrosum admissum, pleraque externa objecta suis coloribus in linteo aut pariete depingere. Infinitos radios ad idem decussationis punctum convenire plerique, ut puto, fatebuntur. Si quis tamen aliter senserit, ac in uno puncto non admodum magnam decussationem fieri dixerit, is saltem non negabit in speculo parabolico omnes radios in unum confluere punctum, ac ex hoc denuo dilatari in ampliora spatia. Non est hujus loci quærere, qui fieri possit, ut universa mundi effigies & pictura cum omnibus suis partibus & coloribus sigillatim distinctis, contineri & repræsentari possit in puncto Mathematico, quod tamen manifestum est; verum illud dixisse sufficiat, si radii deferentes lumen & objecta visibilia ex corpusculis constant, minime posse per punctum istud transire. Quantumvis enim minuta fingantur istæ corpuscula, & cujusunque demum statuantur figuræ, sive virgatæ, sive sphæricæ, sive striatæ, cum tamen corpora sint, tantum abest, ut infinito adeo agmine penetrare valeant, ut ne singula quidem possint. Sint radii A B C



DEF G deferentes objectum visibile in parabolam H I,
mani-

manifeste omnes illi concurrent in puncto K, & inde de-
nuo progredientur & spargentur in LMNOPQ. Lar-
giamur corpuscula istæ esse instar puncti Mathematici
& sigillatim posse punctum K pertransire: Sed jam ab-
surdum erit quam maxime arbitrari, per illud punctum
K posse in instanti transire innumerabilia ista corpuscu-
la, æ quibus componuntur radii qui à K tendunt versus
LMNOPQ.

Quod si quis dixerit corpuscula aut globulos istos
non habere motum progressivum, sed tantum in se mo-
veri, ac eundem motum sequentibus imprimere corpu-
sculis, non minor occurrit absurditas. Si enim globulus
qui est in puncto K, locum servat, non potest eodem tem-
pore nisi simplicem habere motum. At vero ut radii
adfluens ad punctum K propagentur in LMNOPQ,
oporteret in uno corpusculo K infinita discrepantium
motuum genera statuere. Hoc vero cum impossibile
sit, non video, quomodo subsistere possit textura illa
corpusculorum absque axiculis, vestibus aliisve potentiis
se moventium ac propagantium lucem. Debuissent sal-
tem illi, qui tale lucis systema divulgant, modo aliquo
mechanico declarare, quo pacto talis motus fieri possit.
Si in arenæ sextariolo ostendissent, unius arenæ rotatu
cæteris arenis eundem imprimi motum, jam saltem opi-
nioni suæ aliquid coloris addere potuissent. Sive itaque
hanc sive alteram de luminis natura & propagatione
opinionem sequamur, clarum est neutram posse subsi-
stere, cum nomine tenus diversæ, re vero eandem prorsus
sint, utraque quippe lumen corpus esse supponit. Im-
primis vero hoc absurdum, quod dum lumini transitum
parant, ac in omnibus pellucidis corporibus poros ac
meatus aperiunt, illos ipsos tamen mox obstruunt, cum
lucem

lucem; quæ poros ingreditur; ex corporeis particulis compositam esse arbitrantur. Si sic sentiamus, dicendum fuerit particulas aut globulos lucem deferentes, & ipsos esse porosos, aut admittenda est corporum penetratio. Hanc si concedamus, frustra imaginarii isti pori inducuntur, cum etiam absque his detur corporum penetratio, & entia sine ratione non sint multiplicanda.

Cum itaque corpora perspicua pleraque poris careant, & tamen luci sint pervia, sequitur lucem esse incorpoream. Frustra vero dicitur, motum non posse fieri, ubi nihil est quod movetur. Lumen etiam si incorporeum, est tamen aliquid, est ens physicum. Lumen movetur etiam quoad sensum in corpore diaphano immobili. Falsum est itaque motum non posse fieri nisi in corpore quod movetur. Sed propterea quod duo corpora non possunt simul esse in eodem loco, manifestum fit lumen corpus non esse.

Ipsium hoc confirmat motus lucis. Cum enim omnia corpora moveantur in tempore, lucis vero motus sit instantaneus, & hinc quoque patet lucem non esse corpoream.

C A P. VIII.

Lucis motus in vacuo.

VErum quia necdum inter physicos convenit, utrum lux in instanti; an vero successive moveatur, quamvis & hic multum à vulgari recedimus opinione, libens tamen nostram quoque exponam sententiam. Hæc autem quo clarius accipiatur, ipsam lucis historiam trademus; ac indicabimus qualis ejus sit motus in vacuo; qualis item in iis corporibus, per quæ huic patet transitus. De vacuo primum agemus, cujus contemplatio quamvis
ab

ab instituto nostro nonnullis aliena videbitur, siqui tamen rem penitus inspiciant, illi quæstionem hanc non oportunitatem tantum, sed & necessariam prorsus agnoscant.

CAPUT IX.

Ostenditur dari vacuum.

Quamvis itaque complures, ac præcipue illi qui receptæ adhærent Philosophiæ, negent dari vacuum, adeo tamen verum est dari hoc, quam verum sit dari corpora. Non defuere quidem omnibus seculis, qui aliqua ratione vacuum admiserent, nempe putabant si vacuum tolleretur, necessario quoque tollendum esse motum, aut dicendum corpora transire per corpora, itaque locum in quo corpora moventur, vacuum nominarunt. Sed vero illi ipsi cum statuunt omnia loca esse repleta corporibus, in vocabulo ludunt & vacuum est rerum tollunt natura. Tralativa & pueris nota sunt argumenta quæ vulgo adferuntur ad evertendum vacuum, nec nostri otii singulis aliquid reponere: hoc saltem significamus levia esse & pleraque eodem tendere, nempe naturam abhorreere ab omni inanitate & vacuo. Verum utcumque hoc concesserimus (quod tamen minime concedendum est, cum natura potius fugiat nimiam corporum constipationem) nihil tamen exinde consequetur. In loco ubi vivimus & respiramus, propter circumstantiam ambientium corporum, difficulter admodum effici vacuum libenter fatemur. Verum quantumvis admittamus naturam fugere vacuum in hoc nostro orbe, fugam tamen istam in infinitum extendendam non esse, sed terminandam alicubi, & ratio & experimenta clarissime evincunt.

Faceſſant itaque trivialia iſta commenta, qualia vulgo ad deſtruendum vacuum adducuntur, cujuſmodi eſt hoc quod dicunt, ubi nullum eſt corpus ibi nullam eſſe dimensionem : ac ſi ſublato corpore ex aliquo vaſe tam firmiter fabrefacto, ut latera non confluant ab externa, aëris preſſione, non tamen idem quod prius laterum & parietum maneat intervallum. Sed quia negant in hoc noſtro orbe, aut etiam alibi, fieri poſſe vacuum, & locum abſque locato, ut loquuntur, aliquanto hæc accuratius examinabimus.

Primus itaque, qui noſtro ſeculo vacuum etiam in hoc noſtro orbe dari poſſe conjecit, is fuit Galilæus vir mirandæ ſubtilitatis. Hic nimirum ex eo quod aqua in tubis & antliis ſupra octodecim cubitos attolli non poſſit, feliciter collegit, vim illam quæ impedit ne inane fiat, non infinitam, ſed modo & ſpatio certo eſſe determinatam. Hujus exemplum & doctrinam ſubſecuti complures alii experimentum hoc in compendium rede gere, tubosque conſtruxere vitreos quatuor vel trium duntaxat pedum, quos hydrargyro impletos ac poſtea inverſos demifere in vaſculum & ipſum inſtructum hydrargyro, deprehenderuntque hydrargyrum non totum manere neque totum effluere, ſed in altitudine duorum pedum & quadrantis ſuſpenſum hære, ſuperiore tubi parte facta vacua.

Exercuere ſe in novo hoc ſpectaculo variorum ingenia, partim admittentium, partim vero impugnantium vacuum. Aliqui dum quidvis potius quam vacuum concedere vellent, dixerunt ſpatium quod ſupra hydrargyrum in tubo inane compareret, revera non eſſe inane, ſed plenum ſpiritu hydrargyri. Sed hoc ſi eſſet, jam pro ratione & copia egredientis ex hydrargyro ſpiritus, dilaretur

taretur vel comprimeretur spatium inane; quod minime fit.

Alii credidere per vitri poros intrare aërem vel ætherem tenuissimum & laboranti naturæ succurrere. Sed ego ætherem non tantum hic apud nos, sed etiam in ipso æthere ut vocant, frustra quæri puto. Vitrum præterea nullos, ut diximus, habet poros. Fidelissime eo custodiuntur etiam subtilissimi spiritus arte ciniflonum extracti. Verum ut ut admiserimus aërem vel ætherem tenuissimum ingredi spatium ab hydrargyro relictum, non tamen hoc, quod putant, posset contingere: neq; enim suspensus tum hæreret hydrargyros illa qua diximus mensura, sed deflueret ad æquale libramentum cum hydrargyro in vasculo extra tubum contento.

Prædictis argumentis quibus vacuum è rerum natura explodere conantur, addamus quoque alterum multo prioribus fortius. Nempe ex eo quod adplicita materia valde calida ad partem tubi vacuam hydrargyros aliquantum descendat, applicita vero materia frigida hydrargyros aliquantum adscendat, ex eo, inquam, colligunt corpus aliquod esse in parte tubi vacua, quod calore dilatetur, frigore vero constringatur, ac proinde hydrargyrum ascendere faciat. Vel una hæc ratio sufficit, ut multi à veritate desciverint, novumque aliquod elementum introducere conati sint, quod corpus esset & tamen nullum haberet pondus. Hoc vero quis fieri posse existimet? Attamen quia argumento huic multum tribuunt, operæ pretium est ut & huic quoque occurramus.

Dico igitur nullum esse corpus, sive sit aqua, sive hydrargyros, sive denique ipsum vitrum, quod calefactum aliquam saltem substantiam ex potentia suæ materiæ

producere non valeat, quæ vicem corporis suppleat. Consideremus thermoscopium, putant unum eundemque aërem supernè incumbentem aquæ pro ratione caloris aut frigoris ambientis dilatatum aut compressum inclusam aquam vel adtollere, vel deprimere: Atqui id aliter sese habet. Aër in superiori parte thermoscopii conclusus, non idem semper est quantitate. Calor enim ambiens & vitrum permeans, pro ratione suæ intensiōnis, novos subinde producit & suscitatur vapores. Frigus vero, sive potius calor remissior, efficit ut illi eo unde venerunt redeant. Idem in hydrargyro contingit tubo. Vacua est pars tubi quæ est sine hydrargyro. Sed si huic parti admoventis materiam aliquam valde calidam, jam quidem pars illa tubi non desinit esse vacua, aliquid tamen de spatio amputatur. A calore quippe foris adfluente partes hydrargyri tenuiores dissolvuntur; illæ vero solutæ & separatæ non totum pervadunt vacuum, sed, quia pondus habent, infra subsistunt, arctissimeque cohærent hydrargyro, cujus superficiem eatenus disponent & deprimunt, donec idem sit pondus hydrargyri cum incumbente vapore seu effluvio suo, atque antea erat solius hydrargyri.

C A P U T X.

Solvuntur argumenta vacuum oppugnantium.

Nunc videamus quænam illa sit virtus quæ efficit ut aquæ ad pedes $3\frac{1}{2}$ in antliis adscendant, hydrargyrus vero ad pedes duos & quadrantem, cæterique liquores pro ratione gravitatis suæ, ita nempe, ut semper portio contenta tubis æqualem canalem habentibus, ejusdem semper sit ponderis.

Pedes

Pedes quippe $3\frac{1}{2}$ aquæ æquiponderant pedibus $2\frac{1}{2}$ argenti vivi. Hydrargyrus enim decima quarta sui parte aqua est gravior. Eadem est ratio olei, bituminis, omniumque liquorum. Semper hæc sibi constat ratio, ut quale sit pondus liquoris ad liquorem, talis quoque in tubo sit altitudo ad altitudinem.


Hujus rei causa vulgo creditur, quod natura, ut dicunt, fugiat & horreat vacuum. Sed si vacuum non datur, stultum est dicere naturam fugere aliquid quod non sit. Ubi ratio & experientia & ipsa demum natura loquuntur, illic nec Aristoteli, nec ulli mortali locus est. Recte judicarunt qui vim prementis aëris causam hujus phænomeni esse dixere, quantum nempe est pondus incumbentis foras aërei cylindri, seu potius coni coluri, tanti quoque est ponderis portio illa sive hydrargyri, sive aquæ, sive alterius liquoris, quæ intra tubum suspensa est. Facile hoc ex eo colligitur, quod pro ratione altitudinis aëreæ, crescat quoque vel decrescat in tubo statura hydrargyri. Altius surgit hydrargyrus in profundis fodinis quam in vallibus aut planitie: altius hic quam in montibus. Quod si quis ad supremam aëris superficiem posset penetrare, ipsa docet ratio, hydrargyrum tubo contentum in eodem futurum libramento, in quo substitutus sit hydrargyrus tubum ambiens.

Hæc cum ita sese habeant, tamen viri docti non ita pridem solido argumento visi sibi sunt demonstrasse vanitatem hujus opinionis. Putant quippe, si aër pelvi aut catino incumbens æquilibraret hydrargyro in fistula suspenso, necessario eventurum ut in angusti oris fistulis altius adscendat hydrargyrus, ac in tubis latiori præditis ostio, quod quia non fit, ideo alias hujus phænomeni

ni rationes reddere sunt conati. Sed staticæ rationes ad quas provocant, longe aliud jubent. Tubus sive amplum sive angustum habuerit canalem, æquali semper libramento sustinet hydrargyrum. Pelvis similiter quæ repleta est hydrargyro, sive ampla sive modica admodum fuerit tantumdem efficit. Non enim universus aër incumbens universæ pelvi sustinet cylindrum hydrargyreum, sed tantum illa aëris portio, quæ tubum proxime ambit. Quod si etiamnum accuratius scire velis quantillam partem hydrargyri in catino positi urgeat aër qui æquilibrium facit, hoc sic poteris indagare. Ex diametro hydrargyreï cylindri collige aream circuli. Dein alium concipe circulum, qui eatenus distet ab exteriori tubi ambitu ut area comprehensa inter hos duos circulos æqualis sit prædicti cylindri areæ. Jam dico totam vim aëris prementis incumbere plano hujus annuli quo tubi exterior ambitus præcingitur, reliquum vero hydrargyrum, qui in pelvi continetur, nihil conferre momenti ad sustinendum hydrargyreum hunc cylindrum, cum cæteræ hydrargyri aërisque prementis partes, illa tantum urgeant puncta quibus perpendicularly imminet. Quanto itaque major fuerit canalis, qui hydrargyrum admittit, tanto quoque majus erit spatium annularis plani.

Adjungamus & alterum argumentum quo vacuum expugnare conati fuere viri nonnulli eruditi. Dicunt nempe, si quis accipiat vitrum calathoides $ABCD$ illudque hydrargyro impletum invertatur ac mergatur in vasculo BC , hydrargyrum descensurum ad eandem legem, atque in cylindro $EBCF$. Atqui tamen inquirunt osculum BC magis premi debebat à toto hydrargyro $ABCD$, quam à parte ejus $EBCF$. Hinc con-

concludunt non esse aërem
 foras prementem qui hy-
 drargyrum in calathoidē &
 cylindro sustineat, si enim
 hoc esset, hydrargyrum in
 calathoidē longe inferius
 descensurum quam in cy-
 lindro. Sed valde errant
 qui sic ratiocinantur. Oscu-
 lum enim BC non magis
 premitur à toto hydrar-
 gyro ABCD, quam à par-
 te illa quæ cylindro EBCF
 continetur. Hydrargyrus
 quippe qui est ad ostiolum
 BC non premitur nisi ab
 illo hydrargyro qui ad per-
 pendiculum huic imminet,
 quemadmodum etiam in
 aliis contigit corporibus.
 Ponderus itaque AEB quod
 non est perpendiculare
 ostiolo, premit latus AB
 & similiter Ponderus FDC
 sustinetur à latere DC.



Alterum quoque argumentum petunt à subsultatione
 hydrargyri, quando primum tubus invertitur; verum
 istud multo etiamnum prioribus est infirmius. Nam
 quod putant nullam huic reciprocationi causam posse
 assignari, in eo omnimodo falluntur; ratio enim hujus
 subsultationis hæc est, quod hydrargyrus cum primum
 descendit, ipso lapsu gravitatem acquirat, & quanto al-
 tius

tius decidat, tanto quoque inferius descendat, donec post aliquot reciprocationes cum aëre foras incumbente faciat æquilibrium.

Leve quoque & hoc quod objiciunt, si è vitrea sphæra aut alio vase aër exhauriatur, quanto magis is exhaustus fuerit, tanto major nascatur labor in extrahendo reliquo aëre; unde concludunt, cum vacuum, utpote non ens, nullas habeat facultates, non posse ab eo retineri aut assarium aut pistillum antliæ: manifeste igitur retineri ab aëre residuo. Verum id omnino aliter sese habet. Non enim vacuum aut huic permixtus aër retinent assarium aut antliam, sed aër foris incumbens, qui quanto magis evacuatur aër inclusus, & imbecillior fit ad resistendum, tanto gravius incumbit assario, tantoque fortius pistillum deprimat & intro agit.

Leve quoque & hoc quod dicunt non posse ulla antlia totum exhauriri aërem. Hujus enim rei ratio manifestior est quam ut explicari debeat. Cum enim pars tantum aëris sphæra vitrea inclusi transeat in antliam, & proportionalis semper esse debeat aër effluens in antliam ad aërem remanentem in sphæra; quis non videat divisionem hanc posse fieri in infinitum, ac proinde hac ratione nunquam universum aërem posse evacuari? Sed vero in tubo hydrargyreo longe alia est ratio, in quo spatium prorsus vacuum relinquitur.

Quæ dico vera esse vel ipsa incumbentis aëris mensura ostendit. Semper hæc sibi constat ratio, ut quanto capacior sit canalus tubi aut antliæ, quo inclusum aërem exsugere velimus, tanto potentior debeat esse virtus attractiva. Ex diametro & magnitudine ostii antliæ seu cujuscunque cylindri, in quo vel aqua vel hydrargyro vel alio modo vacuum efficere velimus, mensura poten-

tia

tiæ accipi debet, ita ut unicuique uncia adsignentur librae $1\frac{3}{12}$. Tantum enim est pondus incumbentis & prementis aëris.

Siquis sphaeram æream medio dissectam ita aptet ac muniat, ut hemisphaeria accurate confluant, & sic ut aëri nullus pateat transitus, facile ex præmissa ratione intelliget quanta vis esse debeat, quæ, si aër exsuctus fuerit, hemisphaeria à se invicem possit divellere. Ponamus diametrum circuli ubi dissecta est sphaera, esse sesquipedalem seu unciarum octodecim, jam area plani circularis erit unciarum 196. Potentia igitur quæ hæc hemisphaeria divellere possit, futura erit librarum 2700 & pauxillum quid amplius.

Adco vero firmiter hæc sibi constat ratio, ut quocunque modo aliquis id ipsum velit experiri, eadem semper maneat mensura, sive corpus unde aërem exhaurire velimus, sit sphaericum, sive cylindricum, sive etiam planum. Dummodo partes firmiter hæreant, eadem erit ratio ad distrahendas se mutuo contingentes superficies.

Ex follibus undique obturatis, ex coriaceis segmentis aqua aut lotio maceratis, qualibus pueri ad attollendos utuntur lapides, aliisque vulgaribus experimentis adstrui hæc possit sententia, sed sufficere puto ea quæ adduximus.

C A P U T XI.

Aëris altitudo ostenditur.

HOC documento stabilito, metiamur nunc aëris sive atmosphærae altitudinem, quæ facili satis hinc conficitur ratiocinio. Nempe observavere complures & in Galliis & in Italia hydrargyrum pro altitudine loci ma-

D

gis

gis magisque descendere. Quamvis omnes illorum observationes necdum viderim, hoc tamen pro certo comperi; hydrargyri cylindrum ad viginti sex pollices & aliquanto amplius in planitie elevatum, in monte tribus pedum millibus edito, decrevisse tribus circiter pollicibus. Sic itaque pergo, si tres pollices hydrargyri dant altitudinem pedum 3000, jam 26 pollices dabunt pedes 26000. Aëris itaque altitudo secundum hunc calculum, erit millium pass. $4\frac{1}{2}$ sive unius leucæ Germanicæ & $\frac{1}{12}$.

Aliquid tamen demendum de hac mensura, quia peccatum nonnihil fuisse censeo in montis altitudine colligenda. Nam uti docuimus alibi, qui instrumentis nulla adhibita refractionis ratione montes metiuntur, majus his adsignant perpendiculum, quam reverâ faciendum sit. Quantum autem ab hac summa sit auferendum, ut vera habeatur mensura, de eo in meteorologicis diligentius inquiremus. Hoc unum nunc significamus, hunc esse certissimum modum colligendæ & aëris & montium altitudinis, nec obstare inæqualitatem vaporum, quo minus hæc ratio vera maneat. Si pedum duorum & quadrantis-tubum adsumseris, ubique terrarum altitudinem aëris ac illud præterea poteris cognoscere quantum à terræ abes superficie. Quod si in altis versere montibus, multo etiam breviori licebit uti tubo, qui nihilominus desiderio satisfaciet.

C A P U T XII.

*Supra aërem esse vacuum, frustra que ibi
aliud quæri corpus.*

HIs ita constitutis clarum fit quantopere fallantur ii, qui triplicem aëris regionem faciunt, supremamque

namque ad lunam & sidera usque producunt. Si supra atmosphæræ superficiem succederet corpus aliud, utique id premeret atmosphæram, nec spatium in tubo vacuum relinqueretur, cum nullum corpus sit sine pondere. At vero jubet ratio & oculus percipit, id quod supra hydrargyrum in tubo est spatium, esse sine corpore & sine pondere. Talia ergo sunt etiam illa spatia quæ sunt supra atmosphæram.

Frustra vero argutantur nonnulli, & ætherem & auram nescio quam subtilem excogitarunt, quæ pervadat omnia & vel nullum vel insensibile habeat pondus. Nempe putant lignum, corium & chartam poros habere adeo tennes ut aer intrare nequeat. Quia tamen vacuum in illis non admittunt, & recte quidem, ideo necessarium esse existimant, ut subtilis quædam statuatur materia, quæ hos meatus intrare & implere possit. Sed vero nihil imbecillius hoc argumento. Cum enim aqua, oleum & ipsum quoque argentum vivum hæc corpora facillime penetret, quis aëri transitum negaverit? Sublata itaque causa quamobrem talis materia statuatur, ipsa quoque tollitur materia.

Multo vero absurdior hæc reddetur opinio, si quis hanc materiam aut auram subtilem, compactum & constipatum esse dixerit corpus, uti nonnemo nuper adstruere est conatus. Nempe putat ille auram istam subtilem, quamvis vitrum cribri instar penetret, ubi tamen aer fuerit exsuctus, & premitur undique sphaera vitrea ab ambiente aëre, non eadem facilitate qua ingreditur de novo egredi, sed remanere & sustentare latera ne collabantur. Sed quid est nugari si hoc non sit?

Sufficere hæc debebant ad convincendam eorum sententiam, qui nihil inane, sed omnia corporibus plena

esse existimant, quo tamen magis hæc opinio ex animis quorundam extirpetur, hæc & plura alia addi possint: Si non foret vacuum, sed omnia intermundia aëre aut alia materia essent repleta, lumen ubique cerneretur, astra vero non cernerentur. Refractio radiorum omnia turbaret, quæ tamen nulla est in locis supra aërem. Siderum stellarumque motus rapidissimi non constarent. Nec continuus nec æquabilis esset illorum gyrys, præsertim si nova subinde non succederet & instaret potentia. Stridor terræ aërem perrumpentis & permeantis exaudiretur. Cum vero nihil horum eveniat, superest ut tellus & reliqua sidera moveantur in vacuo. Non alibi quam in solo vacuo datur motus continuus & æquabilis. Semel mota corpora semper illic moventur, donec vel interno vitio, vel Dei voluntate, cessent rotari.

Plura de vacuo dicenda supererant, quomodo nempe hujus beneficio multa fieri possint vitæ humanæ perquam utilia, multa item damnoſa; sed quia ad præſens minus faciant institutum, hæc ipsa in aliud tempus reservabimus.

C A P U T XIII.

Qualis sit lucis motus in vacuo.

Constituto tandem vacuo redeamus ad lucem, ac videamus, quo pacto illa in vacuo subsistat, quoque in eo moveatur modo. Creditur vulgo lumen non adesse ubi nihil est quod luceat. Verum non succedit ratiocinium hoc, Non adparet, ergo non est. Ne in puro quidem aëre lux est visibilis, nemo tamen in eo lumen esse negaverit.

Quod vero dicunt, locum ubi lumen sit, non esse perfecte

fecte vacuum, istud tantum abest ut negare velim, ut etiam adfirmare audeam, nullum esse punctum in rerum natura, in quo non sint infiniti motus vere & realiter, ut loquuntur, existentes. Concedo hac ratione nihil in rerum natura esse vacuum. Sed vacuum cum dicimus, intelligimus locum in quo nullum sit corpus. Lucem vero diximus esse incorpoream.

Jam vero quod dicunt, absurdum esse motum statuere, ubi nihil est quod movetur; ipsum id nobis quoque absurdum videtur. Sed lux, sonus, anima, odor, vis magnetica, quamvis incorporea, sunt tamen aliquid. Ut itaque fatemur non posse moveri corpus, nisi corpus præsens sit, ita vicissim censemus res incorporeas, siue illæ è potentia corporis procedant, siue sua sponte subsistant, posse moveri in vacuo.

Corruit & hoc quoque, Ubi nullus est contactus, ibi nullum esse motum. In speculo, etiam in uno puncto, mille imagines semutuo contingentes, possunt existere. Est ergo contactus etiam in incorporeis.

De modo vero quo lumen trajicit spatia vacua, nequaquam dubitandum, quin omnes radii à corpore lucido sparsi recti sint & simplices. Quia enim nullum corpus occurrit ad quod impingant & à quo reflectantur, sequitur etiam ut luminis effluvium sit uniforme, continuum & semper sibi simile.

Motum autem luminis in vacuo esse instantaneum, ex iisdem constat rationibus, cum enim nihil sit quod motum hunc moretur, statuendum necessario, lumen simul existere cum lucente corpore, radios ejus statim integros adparere, nec successive prius vicina quam remota, sed eodem temporis puncto omnia simul collustrare. Si lux corpus esset, secus contingeret, cum nullum corpus


D 3

simul

simul duobus locis esse possit. Sed corporis lucentis imago, id est lux, cum ubiq; præsens esse possit, & omnia puncta illustrata imaginē corporis lucentis contineant, sequitur necessario, lumen moveri in instanti.

Ex eo autem quod in instanti tota producat lux, sequitur etiam lucem in infinitum progredi si nulla obstant corpora. Scio quidem aliter opinari complures qui de luce scripsere, qui radiationem per lineas fieri, ac alios radios aliis longiores, omnes tamen finitos esse existimant; verum horum sententiam nequaquam probo. Lucis essentia continua est, neque constat è partibus aut lineis, neque debent nos fallere radii adparentes circa sidera ac candelas, illi enim formantur à pilis palpebrarum. Ut sciamus lucem radiare in infinitum, sufficit hoc saltem considerare, quod quantumvis longe ab origine progrediendo magis magisque dissipetur lux, nihil tamen ex hac pereat, sed semper recolligi possit eadem qua exit quantitate, idque in quacunque distantia.

Esto vel Sol vel quodcunque aliud lucidum A, unde



procedant radii comprehensi angulo BAC. Dico in quocunque intervallo colligantur radii, æqualem semper fore luminis portionem. Quantum enim illustratur DE, tantum quoq; luminis continetur in FG, vel BC, con-

constabitque hæc ratio in infinitum, dummodo idem maneat angulus, & pro mensura distantiae crescat quoque mensura objecti quod illustratur, sive illud sit speculum sive lens crystallina, sive quodcunque aliud sphaericum vel concavum vel perfectum.

C A P U T XIV.

Quid luci contingat in ingressu corporum.

AC talis quidem est lucis natura in spatiis inanibus, pura nempe, incorporea, invisibilis, infinita recta promanans, & in instanti, nisi ubi corpora obstant, omnia implens. Nunc videamus quid lumini eveniat in ingressu aeris, vitri, aquæ, cæterorumque pellucidorum corporum. Alias hic rerum vices succedere & excepto tantum eo quod incorporea maneat, cæteras lucis facultates immutari, nemo, ut opinor, diffitebitur. Radios namque infici qualitate corporum quæ aut penetrat aut attingit saltem, apud omnes in confesso est.

Tum quoque visibile fieri lumen admittunt plerique. Quamvis enim in aëre raro & tenui non percipiuntur radii, constat tamen eosdem fieri perceptibiles, si aër paulo fuerit constipator. In aqua & vitro aliisque solidis pellucidis id ipsum multo clarius adparet. Manifeste in illis lumen cernitur, & quidem tanto clarius, quanto corpus illustratum magis fuerit solidum.

Radios non ut ante in vacuo recta progredi, sed frangi & reperiuntur pro ratione materiæ quam adtingunt, & hoc quoque notum est. Verum modus & ratio quam natura servat, dum obvia quæque corpora lumine suo perfundit, hætenus quod sciam compertum est nemini. Scripsere quidem complurimi de hac re, vexatissimaque est illa optica pars quæ agit de refractione, sed peccavere plerique

plerique in ipsa principia dum refractionem tantum in superficie fieri contendunt, radiumque perpendicularem irrefractum penetrare, nihilque omnino pati existimant. Operæ itaque pretium fuerit aliquanto hic diutius immorari, rationemque reddere, qua & illorum error palam fiat & simul veritas elucescat. Omnium opiniones recensere nihil hic adtinet, abunde id præstiteri alii: Sufficiat de opinione Cartesii, quæ maxime recepta est hoc seculo, pauca dicere.

Duas is proponit similitudines, quibus motum luminis per corpora explicare conatus est. Prior hæc est.



In lacu calcatis uvis pleno, infra vero in A & B perforato, dicit particulas vini quæ hærent circa C, eodem momento simul ac foramen A patuerit, recta descensum ad illud affectare & simul ad foramen B. Mox subdit, *eodemque tempore quæ circa D & E per hac ipsa foramina descendere properant; ita tamen ut nulla harum actionum alteram impediat, & ne ipsi quidem ramusculi immixtorum scaporum resistent.*

Sed crassius hic profecto est error. Nullum enim corpus siue fluidum, siue solidum, siue ex utroque mixtum, in tali situ diversis locis premere potest. Puncta inferiora ab iis tantum punctis premuntur quæ perpendiculariter inferioribus imminet. Si vas pertusum aqua impleveris, quot foramina infra aperueris, totidem cava perpendicularia in superficie aquæ conspicias.

Quod autem facit differentiam inter motum, & propensionem ad motum, & hoc quoque OEdipo opus habet. Natura non habet propensionem ut illuc moveatur, quo
ire

ire non potest. In vase pertuso aquæ nulli imminentes foramini, non urgent exitum; descendunt tantum ad cavitates superficiiei implendas. Illic demum perpendicularares factæ urgent aquas exeuntes, & simul ipsæ exeunt.

C A P. XV.

Refractionem non fieri in superficie.


ALtera similitudo qua lucis naturam explicare conatur, desumpta est ex motu pilæ: prout enim hujus inclinatio regitur ad modum superficiiei quam vel attingit vel penetrat, eodem modo putat vel reflecti vel refringi lumen. Hac comparatione quamvis ante Cartesium usus quoque sit Keplerus, multis tamen nominibus peccat, nulloque prorsus modo potest defendi. Licet enim supponamus pilæ motum semper æqualem, hoc est infinitum, nihil tamen habebit simile cum radiis lucis, non successive sed in instanti promanantibus. Modum præterea & rationem refractionis adsecutus non est, cum in sola superficie refractionem fieri existimat, ac linteo supra aquam vel aërem extenso comparat. Scio quidem communem omnium opticorum esse opinionem lucem in superficie tantum frangi, quia nempe radii refracti à radiis veris quoad oculum separari videntur simul ac densius diaphanum ingrediuntur, tantum tamen abest ut hoc ita se habeat, ut potius contrarium verum sit, nihilque omnino in superficie corporis diaphani patiantur radii.

Sit vas aqua plenum P Q. Oculus in O. Radius verus A B C D E. adparens A F G H I. Dico luci ex O in A promananti nihil contingere in ipsa superficie A, sed demum postquam superficiem transiit, in ipsa aqua fieri

E

sepa-

separationem radii adparentis à radio vero, idque pro



ratione & copia a-
quæ quæ oculum &
rem sub aqua vi-
sam intercedit. Ita-
que oculo in O con-
stituto, nummus aut
annulus B refractus
comparebit in F. I-
dem nummus ad
punctum C mersus
adparebit refractus
in puncto G. Pari-
ratione punctum D
in H, & E in I refra-
cte videbitur, sem-

perque hæc constabit ratio in omni radio tam perpendiculari quam inclinato, ut pro ratione intervalli, quod distat res sub aquis visa ab aquæ superficie, crescant quoque vel decrescant refractionis leges. Itaque quemadmodum sese habet AB ad BF, similiter quoque se habebunt AC ad CG, item AD ad DH & AE ad EI.

Нос

Hoc ut manifestius explicem, dico, etiam illic radios refringi, ubi nulla est superficies. Qui sub aqua versantur, pleraque sub aquis sita, quarta circiter parte propius abesse putant. Sed & in aëre constituti omnia nobis viciniora adparere alibi satis, nisi fallor, luculenter ostendimus.

C A P U T XVI.

Refractionem fieri etiam in perpendiculari.

VEniamus nunc non ad unius Cartesii, sed ad communem omnium optidorum errorem, putantium radios oblique incidentes refringi, solum vero perpendiculararem nihil pati, sed integrum & irrefractum usque ad fundum medii densioris penetrare. Ut itaque hujus quoque phaenomeni veritatem cognoscas, accipe vas aliquod recto & perpendiculari praeditum labro, impleas hoc aqua: dein sic constituas oculos ut uno interiorem labri oram, altero exteriorem possis contueri. Hoc facto, vel solis oculis poteris colligere fundum vasis multum adfurgere. Ut tamen scias, quanto fundus adparens vero fundo altior videatur, immitte in vas nummum argenteum, ita ut oram labri contingat. Alium dein similem adplica exteriori labro & fac ut inter utrumque nummum solum intersit labrum. Quia vero in simili intervallo res sub aquis visae majores & propiores adparent, necessario nummus qui exteriorem oram stringit minor & remotior videbitur. Attollas itaque hunc eo usque donec pari magnitudine & intervallo uterque nummus se spectandum praebet. Notes dein quam accuratissime locum in exteriori labri ora, invenies illum quadrantem circiter de altitudine totius aquae amputare. Tanta itaque est refractionis luminis & radiorum perpendiculariter advenientium. De his or-


ta Bruxellis ante quinquennium circiter apud Serenissimam Suediæ reginam controversia cum nostram proposuissem sententiam, tantum absuit ut ad sensum impetrarem, ut potius me in principia peccare adfirmarent. nullam enim, inquebant, esse Optices scientiam si convellantur hæc duo Effata, quibus stabilitum sit refractionē fieri in superficie tantum, & præterea perpendicularem nullam pati refractionem. Prius tamen visi sunt tandem agnoscere, persuasi potissimum iis quæ olim ad Melam annotavimus. Alterum vero, refractionem nimirum perpendicularis, nullo modo admittere voluerunt. Oculorum tamen indicio convicti, de vocabulo litem movere cœperunt dicentes incidi quidem radium, non tamen frangi. Verum ex iis, quæ mox dicentur, manifestum fiet, ut spero, idem accidere perpendiculi radio, quod inclinato, nec hunc magis quam illum frangi.

Porro priusquam ad alia refractionis pergam phænomena, præterire non possum insignem Willebrordi Snelii observationem, quæ unice sententiam nostram confirmat. Quantum vir ille fuerit in universa mathesi, quamvis ex iis quæ palam prostant scriptis satis colligi possit, multo tamen id ipsum clarius constaret, si fata permisissent illa quoque perficere, quæ utique perfecisset, si vel paulo diuturniorem Deus vitam indulgisset. Inter alia vero præclara quæ reliquit monumenta, supersunt quoque tres libri optici, quorum usuram superiori hyeme concessit mihi filius ejus.

Quia illi necdum prodierunt in lucem, dignissimi tamen qui prodeant, adponam hic theorema, quo nullum in tota optica nobilius & utilius exstat. Sic vero se habet.

Radius incidentiæ verus ad adparentem in ejusdem generis medio, rationem semper habet eandem.

Sic



Sit π as parallelepipedum aqua plenum A E I Y. Ocu-
lus in O positus rem in E sitam non videbit in loco suo,
sed altius; nempe in G. Quamobrem in aqua alius est
radius verus A E, alius adparens A G. In reliquis qui ad
perpendicularum non inspiciuntur, eadem omnino est rati-
o. Sit enim res obliquè spectatà R, ea per R S, inde
per S O, refracte ad oculum O venit. Jam vero etsi res
intra aquam per R S fluat, tamen per S L in directum
ipsius O manare videre, & oculus rem non in R, sed in
L se videre existimat in perpendiculari M R. Unde effi-
citur radium verum R S, adparentem vero esse S L. Aio
igitur Deum unicum & optimum naturæ architectum
hanc legem radiis diversa media permeantibus præscri-
psisse, ut omnes omnino radii veri & apparentes eandem
semper inter se servant analogiam. Quemadmodum
itaque in perpendiculari, verus radius A E se habet ad
suum apparentem A G, ita quoque se habet S R verus
radius, ad adparentem S L, & similiter N P ad N Q, item
F Y ad F D.

E. 3

Quan-

Quantam utilitatem habeat hoc theorema, nemo optices studiosus non statim percipiet. Vel hujus solius beneficio innumeræ possunt solvi quæstiones, quæ ab opticis moventur, nec tamen explicantur. Hinc quoque facile colligi potest qualis sit illa linea quam in aqua & vitro designat refraction, quam alii conicam, alii hyperbolicam, alii denique parabolicam esse voluerunt. Sed si lineam duxeris, quæ per GLQD & similia extrema adparentis lineæ puncta transeat, longe id se aliter habere intelliges. Una quippe linea recta tribus diversis punctis secare potest hanc refractariam. Hinc clarum fit esse conchoidem, non quidem Nicomedeam aut Antinicomedeam, sed aliam sui generis, cum sint septem diversa conchoidum genera. Verum de his videatur prædictus Snellii liber, qui jam dudum lucem meretur.

C A P. XVII.

Quomodo fiat refraction, & qua proportionem.

REdeamus nunc ad Physicam, & inquiremus, quænam sit naturalis ratio quamobrem radii ad occursum corporum ita afficiantur. Diximus lumen in vacuo non adfici nec pati quidquam, invisibiliter tamen in eo esse. Quod lux fiat visibilis id totum corporibus debetur, illa quippe sunt tanquam instrumenta per quæ lumen ad sensus nostros adpellit. Quanto vero corpora sint densiora & solidiora, modo fuerint pellucida, tanto efficacius & visibilis lumen illis adest si illustrentur. Itaque lux est visibilior in aqua quam in aëre, in vitro & crystallo vero visibilior est quam in aqua. Veruntamen quanto densiora sunt illa subjecta in quæ lux agit, tanto plus patitur lux. Retunduntur enim radii à resistentia cor-

corporis, & si ad perpendicularum incidunt, minus longe progrediuntur, sed in se conduplicantur: si incidant oblique, alio resiliunt & tum quoque, licet minus, debilitantur. Manifeste hoc videre est in baculo aquis ex partemerso, quem si ad perpendicularum inspexeris, portio aquismersa, quanto profundior fuerit, tanto exstantior & crassior adparebit. Nam cum corpora in aqua quoad visum eleventur, de lumine vero nihil perire possit, necessarium est, ut totum id quod longitudini decedit, latitudini addatur.


Cæterum leges quibus inciduntur & retunduntur radii à corporibus, ex ipsorum corporum densitate sunt petendæ. In adamante engyscopiis adjunctus comperisse mihi videor radium adparentem dimidia fere parte brevior em esse radio vero. In vitro radius adparens una tertia brevior est radio vero. In aqua radius adparens una quarta brevior est radio vero. In aëre radius adparens una tantum octingentesima parte brevior est radio vero: octingenties enim circiter aqua densior est aëre. Semper itaque refractionum mensura est colligenda non ex mensura & extensione spatii, sed ex mensura densitatis corporum. In densissimis corporibus maxima fit refractionis, in rarissimis minima, in vacuo vero nulla.

C A P U T XVIII.

Solis & montium refractio quomodo fiat.

MIrum procul dubio videbitur cum tantilla sit refractionis in aëre, qui fieri possit, ut vera sint ea, quæ de longinqua montium adparitione alibi scripsimus. Verum facile se hinc explicabit si quis ad naturam refractionis attendant. Duo sunt consideranda in hac, unum id

id quod jam diximus, nempe radium quomodocunque incidentem semper breviorē videri, in aqua quarta sui parte, in reliquis corporibus illa fere qua diximus proportionē. Verum hæc ratio non sufficit ad probandum phænomenon nostrum. Licet enim merito statuamus, refractionem in aëre terris vicino multo esse maiorem prædicta mensura, propter densiorem mixturam vaporum, solus tamen hic effectus præstare non potest, ut montes & sol tam alte sub horizonte merſi denuo in adspēctum veniant. Recurrendum itaque ad alterum refractionis effectum, illum nempe qui facit, ut quanto longius à perpendiculari discedant radii incidentes, tanto altius resiliant, & tanto maiorem efficiant refractionis angulum. Hæc sola ratio sufficit ut montes & sidera multum infra horizontem depressa denuo compareant, & hoc ipsum quod exigua admodum sit aëris refraction, præcipua huius phænomeni causa est. Solida enim diaphana aut densa valde, desinunt esse diaphana si nimium extendantur & dilantur: & ut id aliter foret, tamen radii priusquam ad oculos pervenirent, impacti in terram necessario deficerent. Constituatur oculus extra atmosphæram exiensque ab eo radius AB impingens in partem atmosphære BCDE ad punctum B, manifestum est hunc radium si impingat ad punctum B non progredi ad punctum G, sed frangi & ingredi atmosphæram. Jam vero si tanta esset atmosphære refraction, atque est vitri, clarum est illum non longe progressurum sed declinaturum terram versus ad punctum E factō angulo GBE gr: 48. min: 11. tanta quippe est maxima in vitro refraction. Oculus itaque A videbit punctum E refractum ad punctum H. Si atmosphære tanta esset refraction atque est aquæ, aliquanto



quanto longius progredieretur prædictus visorius radius nempe ad punctum F, facto angulo GBF gr: 41. 24. Ac tum quidem punctum F refractum adparebit ad punctum I. Neuter itaque radius perveniet ad punctum D. Sed vero cum aëris minima sit refraction, longe ulterius progredietur visus, & pertinget ad D per lineam BD, tumque res ad D posita, ab oculo A videbitur in G.


Hinc facile solvitur famosa illa quaestio quæ multos
F hæc-

hactenus exercuit astronomos, unde nempe fiat, ut Canopi sidus alia lege Rhodiis, alia Alexandrinis oriatur. Cum enim Rhodus absit ab æquinoctiali gradibus 36, Alexandria vero gradibus 31, manifestum est discrepantiam latitudinis quinque duntaxat esse graduum. Atqui tamen si oculis & omnium antiquorum auctoritati credere velimus; longe majus debeat esse horum locorum intervallum. Canopus quippe cum Meridianum attingit, quarta parte signi, id est septem gradibus cum semisse, supra horizontem exstat Alexandriæ: idem vero Rhodi horizontem stringit, vixque è locis editis ad breve tempus est conspicuus. Snellius in Eratosthene hanc discrepantiam inde profectam putabat, quod qui Rhodi Canopum orientem observavere, non adtenderint ad altitudinem montis Ataburii Rhodo à meridie oppositi. Itaque existimabat Canopum à Rhodiis videri, non cum horizontem tangit, sed duobus demum gradibus supra horizontem provectum, quando nempe supra montis culmen emergit. Sed error hic nimium crassus est quam ut in eum Eudoxus, Posidonius ac tot alii præstantes Mathematici impingere potuerint. Mons Atabyrius non ad octo tantum, ut ipse credit, sed ad tota quindecim stadia in perpendiculari altitudine referente Gemino adsurgit. Præterea mons iste Rhodiorum civitati non ad austrum, sed ad Septentrionem situs est, est quippe is qui vulgo S. Filermi adpellatur. Ipsa vero civitas liberum prospectat pelagus, cum sita sit in parte insulæ maxime orientali, longèque satis in mare excurrat. Keplerus aliter hanc difficultatem solvere conatur in paralipomenis ad Vitellonem. Putat quippe Canopum aliquot gradibus citius Alexandrinis oriri propter refractionem quam efficiant pluviae ad montes Lunæ, unde Nilus oriatur. Verum hæc ratio non

non tantum omni caret colore, sed & absurda est prorsus. Bis mille passuum millibus absunt ut minimum montes lunæ ab Alexandria. Ut præterea Sol maturius videatur, obsunt, non profunt pluviae. Si cælum nubilum sit vel pluvium, vel non adparet sol, vel saltem tardius adparet. Prorsus itaque contraria huic phænomeno ratio est assignanda, atque sit illa quam Keplerus adduxit. Nempe quia Alexandria à meridie cælum solum & serenum obtenditur, ideo à longiori tractu sidera refracta visuntur. Densior enim & humidior aër efficit quidem ut prope posita maiorem patiantur refractionem, sed vero ut res longe dissitæ ad aspectum perveniant, necessarium est, ut minor fiat refractionis angulus, uti ex præmissa liquet demonstratione.

Hæc quamvis ipsa ratio dictare videatur, difficulter tamen admittuntur ab iis, qui non intelligunt quomodo res aliqua in atmosphæra sita possit videri extra atmosphæram. Ut itaque subjectum esset, cui inhærere possit rei visibilis imago, atmosphærae immensam admodum tribuerunt altitudinem, aëremque ad quinquaginta & amplius passuum millia attolli dixerunt. Verum quam hoc sit absurdum, ex iis quæ alibi diximus, satis liquide patet. Quum vero putant imaginem rei visibilis non posse videri, nisi etiam ipsa res visibilis radiis aut rectis aut fractis locum adparitionis contingat, in eo quoque valde falluntur.

Oculus O videat rem C sitam in fundo medii densioris ABC. Quandoquidem vero imago rei refractæ semper videtur in concursu perpendicularis rei refractæ & continuatæ lineæ refractionis, necessario res



tur, idque tanto magis, quanto obliquius immergatur. Non vero satis adtendunt ad refractionum naturam, qui punctum B per lineam rectam in E dicunt refringi, ac sic per aliam rectam ad visum pervenire: res enim refracta semper adparet perpendicularis rei refringenti, ac unum quodque punctum linearum adparentium exacte imminet illis punctis à quibus species refringuntur.

CAPUT XIX.


Refraclio in luna, & mensura montium lunarium.

TRanseamus nunc ad lunam, & ostendamus quod hic in terris idem quoque istuc contingere, nec naturam adeo sui dissimilem esse, ut in sphæra quæ quadrages hac nostra tellure minor sit, tam immanes extruxerit montes, ut iis comparati terrestres propemodum colles videantur. Primus qui illos conspexit Galilæus, idem etiam mensuram illorum prodidit, quam tali ratione indagare est conatus.

F 3

In

In parte obscura lunæ vertices altiorum montium à sole illustrati manifeste cernuntur ad distantiam vicesimæ partis diametri lunaris remoti à confinio lucis & tenebrarum. Cum vero diameter lunæ sit 2000 milliarium, qualium terræ diameter est 7000, jam quoque habetur montium lunarium altitudo, idque hoc pacto.



Esto pars obscura lunæ ABC. Solis radius veniens à D tangens terram in A & verticem montis in E. AE vicesima pars diametri est millium 100. Semidiameter vero AF millium 1000. Cum vero triangulum EAF sit rectangulum, erunt quadrata laterum EA & AF, æqualia quadrato basis EF. Junge itaque quadrata laterum & habebis aggregatum 1010000. Hujus radix quadrata major est quam 1004, & minor quam 1005. Ablato itaque FB milliarium 1000, remanet altitudo montis BE millium fere quinque.

Jam vero cum Galilæus nullum in hoc nostro orbe montem plus unius milliari perpendicularum habere existimet, lunaribus vero montibus tribuat perpendicularum quinque fere millium pass. clarum est illum montibus lunaribus centuplo majorem attribuere molem, quam terrestribus.

Tantum pondus in tam exili corpore, si telluris vastitatem respiciamus, cum nullam prorsus rationem habere videatur, non immerito multos permovit, ut dubitarent de hoc phænomeno. Dissentiendi non levis causa fuit ista, quod lunæ rota in plenilunio non dentata, sed

sed plena undique adpareret, quod utique non fieret, si vastis a deo turgeret montibus. Non defuere etiam viri præclari, qui accuratioribus instrumentis adjuti, spatium quod illustratos vertices & confinium lucis ac tenebrarum intercedit, acciderint, deque mensura montium multum abraferint; efficere tamen non potuerunt, quin immensa & incredibilis prorsus maneret altitudo. Complures quidem plurima dixere, nemo tamen veritatem quod sciam attigit, à qua utique non aberrassent, si refractionis habuissent rationem. Hæc sola evincit eandem esse proportionem montium lunarium ad corpus lunare, ac sit terrestrium ad hanc nostram terram. Ostendimus jam olim, nullum esse montem in hoc nostro orbe, qui ad tria passuum millia adsurgat. Ostendimus etiam montes, quorum vertices infra horizontem subsident, refractos denuo videri, eorumque speciem ad sexaginta ac nonnunquam ad septuaginta leucas Germanicas porrigi. Componamus nunc inter se hæc intervalla.

Montes lunæ secundum accuratissimam Hevelii mensuram videntur cum absint vicesima sexta parte diametri lunaris. Diameter lunaris est leucarum Germanicarum 500. Apparent ergo illustrati montium lunarium vertices à leucis Germanicis 19.

Sumamus jam 26 partem diametri terrestris. Illa vero est leucarum Germanicarum 1718. Hujus vicesima sexta pars conficit leucas 70. Ad tantum igitur intervallum adparent montes terrestres.

Quæramus etiam altitudinem montium lunarium. Illa sic haberi potest. Ponamus in hac nostra tellure summam montium altitudinem trium circiter millium passuum. Iam sic pergamus; Distantia 70 leucarum in terris dat altitudinem 3 mill. pass. seu stadiorum 24.
quan-

quantum dabit in luna distantia 19 leucarum. Manifeste fient stadia $6\frac{1}{2}$. Tanta igitur est summa montium lunarium altitudo perpendicularis.

Hinc quoque colligitur, quanta sit moles montium lunarium ad montes terrestres. Ex perpendiculari lunæ fac solidum cubicum, erit illud stadiorum circiter 260. Iam vero cum ex hypothese nostra summa montium altitudo sit minor tribus pass. mill. sive stadiis 24, sumamus 22. Solidum cubicum hinc fiet stadiorum 10648. Divide hunc numerum per priorem, nimirum 260. Efficiet 40. Moles itaque montium terrestrium quadragies major est mole montium lunarium. Quanta igitur differentia est totius telluris ad totam lunam, tanta quoque est differentia inter montes terrestres & lunares.

Satis ex his colligi potest, nisi fallor, quantum errent illi qui putant lunæ globum siccum esse corpus, nec quidquam habere similitudinis cum hoc nostro orbe: itaque nec aquam, nec nubes, nec aërem istic esse, nec pluvias descendere, nec quidquam eorum ibi contingere quæ apud nos fieri solent. Sed si nullus hanc sphaeram ambit aër, unde ergo tanta refractio? Quod si aërem fateantur, utique etiam & maria & paludes & flumina admittant necesse est, cum absque his nec aër nec vapor ullus possit subsistere. Non itaque probo argumentum viri magni, qui in dialogis de mundi systemate, ex eo quod constans & similis semper sit lunæ adspectus, nec ullam unquam nubium aut aliam in superficie ejus mutationem telescopia deprehendere potuerit, conatus est adstruere nullas illic provenire pluvias; idem quippe in hac nostra tellure contingit. Siquis enim ex sublimi montis vertice nubes infra se positas prospectet, quantumvis eæ condensatæ fuerint. & vehementes profude-

rint

rint imbres, eadem tamen manet nubium facies, nec quidquam eorum quæ inferius fiunt, spectabitur ab iis qui in superiori versantur loco. Quemadmodum vero illi, etiam cum defæcatissimus est aër, terram non nisi obscure & tanquam per nebulam cernunt, ita neque nos solidum lunæ corpus videmus, sed tantum atmosphæram ejus. Cum enim major claritas officiat minori, fieri aliter vix potest, quin vapores lunam regentes trans aërem spectati difficulter à nobis penetrentur. Præter itaque vertices montium & obscuram lunæ imaginem solas cernimus nubes. Nec alia ut puto cæterorum siderum est ratio, non Iovis non Saturni, nec ipsius annuli Saturnii. Præter nubes & vapores singulos globos & anulum istum ambientes, nihil omnino videmus.

Sed neque argumenta probo, quibus adstruere conatur nulla in luna vivere posse animalia. Nam si quis recte calculum ponat, inveniet lunam non minus benigno solis adspectu frui & foveri, quam hæc nostra tellus. At vero si in luna eadem dierum noctiumque esset ratio, atque hic apud nos, tum sane frigore esset inhabitabilis. In minores sphaeras imbecillius agere solis radios sensus & experientia docent. Hinc factum ut remotiora à sole sidera majora, viciniora vero longe sint minora. Quod si ea non semper sibi constet proportio, id aliis compensatur rationibus. Ut itaq; æqua & convenienti mensura luna calefiat, ita disposuit naturæ architectus, ut quia diurna & citata circumrotatio officiat ad concipiendum calorem, totis quindecim diebus inferioris hemisphaerium à sole illustretur ac totidem aliis superius. Præterea ne hyemis rigor partes habitabiles nimium læderet, ita istic annum ordinavit rerum conditor, ut cum apud nos inter maximam minimamque solis

G

alti-

altitudinem discrepantia sit quadraginta septem circiter graduum, in luna ea differentia decem circiter sit graduum.


Huic accedit quoque tertium, illud scilicet, quo fortius luna imbibat & diutius retineat impressum calorem, passim montes ita formavit Deus, ut ambitu suo profundas efficiant valles, & adeo quidem, ut nisi umbræ fallant, depressiores sint non modo reliqua tellure, sed & ipsa maris superficie. Hæc cum etiam oculis beneficio telescopii manifeste pateant, non video quamnam suæ opinioni causam possint prætexere, qui sentiunt lunam corpus esse otiosum, & naturam quamvis omnia ad gignendum alendumque ibi disposuerit, nullo tamen id fecisse sine. Verum hæc extra institutum. Revertamur ad propositum, ac causam refractionis doceamus.

C A P U T XX.

Vera refractionis causa explicatur.


Diximus superius lumen incidens in quodcunque corpus pellucidum pro ratione densitatis corporis quod ingreditur magis vel minus pati. In vitro aut crystallo radium incidentem tertia, in aqua vero quarta sui parte breviorē videri. In reliquis corporibus pellucidis naturam eandem semper servare legem, ut quanto illa magis sint solida, tanto magis patiatur lumen quod incidit, tantoque altius res spectata adsurgat. Radios vero ideo breviores fieri diximus, quia retunduntur pro ratione resistentis corporis, ac quanto altius corpus pellucidum ingrediuntur, tanto magis dilatantur partes ejus inferiores. Idem nempe contingit luci licet incorporeæ, quod clavo è ligno aut alia cedente materia, quem

quem si in aliud aliquanto mollius corpus impellas & adigas, retunditur & dilatatur ejus mucro, idque tanto magis, quanto altius penetrat. Vel oculo judice id ipsum clarum fiet, si baculum aut cylindrum aquæ immerferis, manifeste enim partes hujus quanto profundius aquam ingrediuntur, tanto magis refringentur ac dilatabuntur, & quod longitudini adimitur, id latitudini addi videbitur. Jam vero sive quis perpendiculariter species visibiles sub aqua aut alio pellucido corpore sitas contempletur, sive oblique, eadem semper erit ratio radii veri ad adparentem, & si pro ratione corporis pellucidi radius perpendicularis adparens tertia aut quarta parte sit brevior radio vero, tanto quoque brevior erit radius adparens & oblique incidens, quam sit radius verus & ipse quoque incidens oblique. Res itaque in aqua aut alio medio denso visæ, qualicunque situ collocentur, eandem semper servant legem, & si punctum aliquod quarta parte vicinius adpareat oblique spectatum, adparebit quoque quarta parte vicinius in perpendiculari. Verum longe dispar est ratio si quis species visibiles in diverso medio collocatas non $\kappa\tau\ \mu\eta\kappa$ sed $\kappa\tau\ \pi\lambda\acute{\alpha}\tau$ consideret: cum enim quodlibet punctum in perpendiculari spectatum in eadem semper adpareat linea, in iis radiis quæ oblique feruntur, longe secus contingit, quanto enim punctum aliquod visibile obliquius videatur, tanto longius à perpendiculari recedit. Ut hujus rei causam exploremus, necessarium est prius explicare naturam radiorum, in simile & homogeneum medium incidentium. Ponamus ergo planum aliquod opacum AB, in quod allabantur radii CA, CD, CE. Etiam illi qui parum in Physicis versati sunt, norunt radium perpendicularem CA omnium fortissime incidere in planum



A B. Imbecilliorē vero eſſe C D, magis etiamnum imbecillē C E. Jam vero quēmadmodum radii incidentiæ quanto obliquius incidunt, tanto minus habent roboris, ita viciffim illi in ratione reflexa tanto fortiores ſunt, quanto longius à perpendiculari recedunt. Itaque radius C A omnium fortiffimus in ratione recta, omnium imbecilliffimus eſt in actione reflexa. Fortius reſilit D F, fortiffime vero E G, & ſic porro. Hinc eſt quod glandes è ſclopetis exploſæ ſi *nar' & d'v* & ad angulos rectos incidunt, non tamen lædant, quando redeunt. At vero eadem tanto magis lædunt, quanto acutiores incidentiæ & repercuffionis angulos deſcribunt. Ipſum hoc evincit ratio; cum enim motus qui fit in recta linea omnium fit fortiffimus, lineæ vero incidentiæ & reflexionis quanto obliquius incidunt & reperiuntur, tanto propius ad rectam accedant, ſequitur quoque ut ille motus fit fortior.

Cum vero refractio aliud non ſit quam reflexio interna, ſeu repercuffio Lucis in ipſo corpore pellucido, minime mihi difficilis videtur cauſa quamobrem radii corpus pellucidum penetrantes quanto obliquius incidunt, tanto quoque altius adſurgere videantur. Sit vas aqua plenum A B C D. Oculuſ conſtitutus in O, videat nummum aut aliud viſibile in perpendiculari O B. Ma-
niſeſtum



nifestum est, secundum ea quæ diximus, quod punctum B non adparebit in suo loco, sed vero una quarta parte superficiæ aquæ vicinius nempe in E. Ponatur res visibilis in F, adparebit in G per lineam O G. Promoveatur eadem res visibilis in H, tum videbitur H in I per radium O I. Eadem ratione punctum K spectabitur in L, & D in M. Itaque quanto obliquius res aliqua sub aqua sita spectetur, tanto altius adscendent puncta adparitionis. In hoc solo est differentia, quod in reflexione simplici radii ulterius progrediuntur, & angulos incidentiæ & repercussionis æquales efficiant. At vero in refractione imago objecti visibilis semper ad perpendiculum imminet ipsi objecto visibili.

Hinc porro colligi potest falli eos qui putant radios visus & lucis in ingressu corporis pellucidi curvari & à sua directione divergere. Si enim proprie loquamur, non divergunt nec inclinantur radii qui fracti dicuntur, sed in eadem semper manent directione. Quod enim objecta F, H, K, & D, per lineam non rectam perveniant ad oculum O, id ex illo non contingit, quod radii in su-

G 3

per-


perficie aquæ incurventur, ut vulgo credunt, sed ex eo quod imago objecti cujusque visibilis perpendicula-riter adsurgat & resiliat ad puncta G, I, L, & M, ad quæ radii recti OG, OI, OL & OM possunt adpel-lere.

C A P U T XXI.

*Quare radii oblique in aliquod corpus parallelepipedum inci-
dentes in ingressu & egressu paralleli sint.*

EX eadem pendet ratione quamobrem radii inci- dentes in medium densius & exinde egredientes pa-ralleli sint, non enim radii in superficie incurvantur, ut vulgo putant, sed quia objecti depressioris imago visibi-lis eatenus adsurgit, ut à radio incidente contingi pos-sit, ideo radii incurvari videntur, cum tamen illi recta semper ferantur. Sit frustum vitri aut crySTALLI AB. No-tum est radium incidentiæ CD non recta fluere ad pun-ctum E, sed videri alio ferri ad punctum scilicet F, & inde egressum tendere ad G, ita ut radii CD & FG sint paralleli. Hujus rei causa non ea est quæ vulgo creditur, quod radii in superficiebus, hoc est in ingressu & egressu incurventur, quamvis sic judicant oculi, ve-rum quia imago objecti visibilis in F adsurgit & refrin-gitur in H, ubi videtur aut illustratur ab oculo aut lu-mine constituto in C. Ac sic fit ut objecta F & G, non in suo loco, sed F quidem adpareat in H, G ve-ro in E.

Verum esse quod dico, hoc sic probari potest. Pona-mus radium aut lineam CD recta ferri ad punctum H, manifestum est secundum leges refractionis punctum H appariturum non in suo loco, sed altius, nempe in I. At vero



vero oculus in C constitutus non poterit per radium CD objectum F videre, nisi dicamus radium deorsum deprimi ut objectum visibile contingat, quod est contra naturam refractionis quæ omnia adtollit. Pater itaque verum esse quod dicimus, inferiores nempe crystal-
 li partes refractas adsurgere, & quemadmodum punctum H refractum adparet in I, similiter F refringi in H. In hoc nempe puncto radius lucis cum imagine rei visæ concurrat.

Quia itaque inferior crystal-
 li superficies altius attolli videtur & punctum, F in H adpareat, necessario quoque sequitur ut radius superne incidens & fundum F non in suo loco, sed in loco adparitionis nempe in H contingens, ab oculo C in recta quidem videatur linea, vere autem effluat in F, tanto nempe inferius, quanto altius attollitur punctum H supra punctum F.

C A-

CAPUT XXII.


Quo pacto radii afficiantur in ingressu & egressu sphaericorum corporum.

SIt sphaera vitrea aqua plena ABC. Notentur in ea puncta EFGBIKE aut charta aut aliquo colore. Si oculus constituatur in D, praedicta puncta non in suo loco sed vicinius adparebunt, nempe E adparebit in A, F in M, G in N, B in P, I in Q, K in R, L in C. Brevis itaque spatium comprehensum inter E & L, latius explicatum adparebit ab A usque ad C.

Missi deinde chartula patiamur, si fieri possit, ut radii effluent. Aio futurum ut omnes quotquot è sphaera profiscuntur radii, semper eandem servant directionem, ita ut à punctis adparitionis recta transeant per illa puncta unde fit adparitio. Radii ergo maxime obliqui quales sunt AE & CL illi haud longe à sphaera concurrent, nempe in O. Aliquanto longius progredientur MF & RK, concurrent quippe in S; Quanto vero viciniore sunt illi quæ per centrum fertur linea, tanto longius progredientur. Itaque NG & QI demum in V concurrunt.

Satis, nisi fallor, manifeste hinc colligi potest, quantum à veritate recesserint illi, qui putarunt radios à visu & luce procedentes in ingressu & egressu sphaeræ frangi, nihil vero in medio pati, cum è contrario in medio tantum frangantur, in puncto nempe adparitionis, alibi vero quoad oculum recta ferantur.

Et sane rationi adversatur radios recordari quid sibi in ingressu contingat, idque in egressu imitari aut alio modo compensare. Sic enim si statuamus, dicendum fuerit
radios



H

radios esse animatos ac sentire quid sibi futurum sit, ut nonnulli existimarunt. Hæc vero nostra methodus, præterquam quod experientia comprobatur, etiam sensui satisfacit.

C A P U T XXIII.

Omnia corpora simplicia esse pellucida.

HAtenus conati sumus ostendere quomodo se habeat lux in spatiis vacuis, quomodo item operetur in corporibus pellucidis tam fluidis quam solidis; superest ut de corporibus opacis dicamus, & quo pacto ad horum occursum lumen adficiatur. Opaca vocantur ea corpora quæ colorata sunt & lucem non transmittunt. Si stricte vocabulum accipiamus, nihil præter vacuum erit pure pellucidum, cum pleraque corpora quantumvis clara videantur, quia tamen videntur, manifeste aliquid habeant opacitatis. Aqua, crySTALLUS & similia corpora, si in densa nimium spectentur copia, desinunt esse pellucida & pro diversitate aspectuum diversos quoque induunt colores. Vel ipse aër quantumvis purus, si multum condensetur, fit opacus & luci impervius.

Jam vero si vocabulum communi & latiori significatu accipiamus de iis corporibus quæ lucem totam repercutere creduntur, qualia sunt lignum, lapides & metalla, ne hic quidem recte mihi sentire videntur, qui lucis penetrationem non concedunt. Uti vitrum, aqua & aër si densa adsit copia perdunt pelluciditatem, ita vicissim illa, quæ diximus opaca, si attenuentur, fiunt pellucida. Si ligni fibras à reliquo corpore separatas in sole observes, sunt perspicuæ. Eadem est ratio terræ & argillæ; si enim singulas particulas & arenas seorsim con-

tem-

templeris, vitri & crystalli claritatem iis inesse senties, præsertim si engyscopiis utare. Per marmor vero, etiam si cubitalis fuerit crassitie, motum candelæ facile animadverteres. Auro nihil solidius & densius, tamen etiam illud si in tenues bractæas dilatatum adverso sole spectetur, fulvus color cœruleo permutabitur, & fiet quodammodo pellucidum. Ut itaque nullum corpus sive solidum, sive fluidum, adeo est diaphanum, ut non aliquid habeat opacitatis, ita viceversa nullum corpus & ipsum similiter vel fluidum vel solidum tam est opacum, ut non aliquid saltem habeat pelluciditatis si in partes concidatur. Quin & hoc quoque addo, nullum esse corpus, qualecunque demum sit, dummodo simplex & incompositum fuerit, quod non sit omnino diaphanum. Hoc quo facilius accipiat, operæpretium fecerimus si causam & modum opacitatis corporum ostendamus.

CAPUT XXIV.

Colores non esse lumen, & unde oriantur.

QUOD itaque corpora quædam pellucida, alia vero opaca videantur, id non aliunde quam ex colorum admixtione provenire certum est. Nisi colores essent, omnia pellucida aut alba viderentur. Nullum est corpus seu fluidum seu solidum quod non statim fiat pellucidum si ab eo separetur color. Quapropter non recte ii sentiunt, qui colorem vocant lumen modificatum, cum lumen nihil æque contrarium habeat ac colorem. Si colores aliquid in se luminis continerent, utique noctu & in tenebris lucerent; quod tamen non fit. Sed expediamus colorum originem & materiam.

Causa igitur & origo colorum omnis est ab igne seu calore. Hujus rei indicium quod in locis algentibus omnia fere candescant ipsaque etiam animalia albescant hyeme præsertim. Albor vero est principium potius coloris, quam color, ut mox dicemus. In calentibus vero locis tota est colorum varietas. Quidquid sol benignis radiis collustrat, id protinus gratam & jucundam accipit tincturam. Quod si in frigidis quoque regionibus nonnulla etiam colorata inveniantur, illa cum admodum sint rara & imbecilliter tincta, conatum potius deficientis naturæ, quam vim & potestatem ejus declarant. Majorem itaque colorum diversitatem possit præstare una avicula Indica, quam omne volucrum genus quod Norvagiæ Suediæque sylvas populatur. Eadem cæterorum animalium, plantarum & florum est ratio. In prædictis locis ne in vallibus quidem colores ullos rutilos aut vividos invenias, nisi arte parentur, aut singulari aliqua soli facultate proveniant. Quod si quis etiam ulterius versus septentrionem procedat, omnia illic cana & albidia occurrent. Statuamus itaque causam colorum ab adustione corporum provenire.

C A P U T XXV.

Colorum materiam esse à qualitate sulphuris.

Ipsam colorum materiam quod adtinet, illa non aliunde procedit quam à sulphure singulis corporibus admixto. Pro varia hujus elementi adustione varii quoque nascuntur colores. Sulphur nativum & necdum ignem aut calorem expertum translucidum est. Cum solvitur tum demum diversos induit colores & inquinat corpora quibus admixtum est. Primo quidem viridem, dein
flavum,

flavum, mox rubrum, dein purpureum, & denique nigrum inducit colorem. Exhausto & consumto omni sulphure solvuntur corpora, color omnis abit, & nihil præter album seu pellucidum superest cinerem. Principium itaque colorum est albor, finis vero nigrities. Albus minime color, niger vero maxime. Sed singulorum colorum genera ac gradus percenseamus.

C A P U T XXVI.

Ordo colorum.

Primus itaque color, si tamen color dicendus sit, is est albus. Proxime hic pelluciditatem accedit; quippe cum omnia corpora natura sua sint pellucida, primus hic opacitatem inducit, fitque visibilis exigui luminis accessu, etiam non liquefacto sulphure quod singulis corporibus inesse diximus. Si enim comminuat quodcunque pellucidum corpus & diversas accipiat superficies, protinus compareret albor. Nec interest utrum solida an fluida fuerit materia, æque enim aqua si in spumam convertatur, ac vitrum in pollinem redactum pelluciditatem albo permutat colore. Et hic quidem est primus alboris modus, quem solum si spectes, jam albor minus proprie coloribus accenseri debet, si enim singula corpuscula aut singulas superficies seorsim spectes, manet pelluciditas, solaque corpusculorum positio & situs fallaciam facit adspectui. Alter alboris modus est quando in corpore pellucido fotu lucis aut caloris liquefiunt & accenduntur partes sulphuris subtiliores. Cum enim hac ratione siccantur & rarefiant corpora, sequitur necessario ut tum quoque variaz oriantur superficies; itaque etiam hoc pacto pellucida, etiam priusquam accedat

rinctura sulphuris, albescunt. Est enim universalis regula, ut omne corpus pellucidum minutim concisum fiat album; & viceversa omne corpus album constat è minutis particulis pellucidis.

Proxime albori succedunt alii duo colores viridis dilutior & flavus. Si imbecillior sit calor qui dissolvat id quod in corporibus est sulphureum, præcedit viridis, utpote qui crudior & aquosior sit quam flavus. Quod si intensior excoquat calor, albo mox flavus succedit color, qui & maturior & magis igneus. Verum si flavitas succedit albori, jam nullus virori superest locus, semper enim tam in plantis, quam in aliis corporibus, si illa viridia fiant, viridis color præcedit flavum.

Quocunque ordine numerentur colores, medius semper est rubeus. Maxime hic est flammeus. Non quidem hic sit ex albo & nigro, cum sulphuri suos debeat natales, sed tamen ex hoc & duobus illis componuntur quotquot sunt colores.

Si major etiamnum superveniat corporum & sulphuris ambustio, sequuntur purpureus & cæruleus colores, quorum mixtura est nota. Terminus colorum & suprema combustio est nigrities. Hæc est postrema sulphuris rinctura & ultima actio. Hanc sequitur corporum dissolutio. Exhausto sulphure consumptoque humore, nihil præter album & pellucidum relinquitur cinerem, cui si humorem & coagulum reddideris, corpora ad priorem redeunt statum.

In illis porro flammis, quales exsurgunt in focus quotidianis, contrarius est colorum ordo. Quanto enim nigrior est sulphuris rinctura in carbone, tanto purior & candidior oritur flamma. Quæ itaque primo prodit flamma, propter sordes admixtas obscura est & tenebrosa:

brofa: hinc purpurea, inde rubens & mox flava fit. Cum incipit albescere, id signum est quod sulphur & materies combustibilis ad finem properent. Non datur vero flamma vel nigra, vel penitus alba. Si enim nimium obscuratur, fumus est, non flamma: si albescat nimium, nec tum quoque diutius subsistere potest deficiente alimento.

Satis jam, ut puto, manifesta est ratio quamobrem diversa corpora pro diversa sulphuris tinctura aliis aliisque coloribus se videnda exhibeant. Nec, ut puto, hac in parte adversabuntur Chymici, qui quamvis ut de cæteris, ita quoque de coloribus, valde confuse & ænigmatice loquantur, non multum tamen ab iis, quæ hæcenus diximus, recedere mihi videntur.

C A P. XXVII.

Quomodo colores apparentes generentur.

ALia nunc explicanda est quæstio, eaque multo vexatior & difficilior, unde nempe oriantur colores à corporibus suis quodammodo separati, quos adparentes vocant, quales sunt colores iridum, auroræ, ac item illi qui per prismata vitrea sparguntur. Ex iis quæ diximus, satis ut puto liquet, flammam semper sequi colorem sulphuris & omnes admittere colores excepto nigro & penitus albo. Insunt quidem sulphuri hi duo colores, sed flammæ proprie inesse non possunt. Albæ quidem videntur tenues flammulæ, eadem tamen si omnino tales essent nihilque alterius coloris admixtum haberent, forent pellucidæ, ac sic nullam aut debilem admodum spargerent lucem. Nigra vero ut sit flamma, hoc rationi & sensui adversatur.

Hoc

Hoc posito sic pergo, qualis est color sulphuris in materia combustibili, talis quoque est color flammæ. Qualis vero est flamma, tale quoque est lumen quod à flamma spargitur. Cum vero flamma omnes contineat & comprehendat colores, idem lumini eveniat necessum est. Insunt itaque & lumini omnes colores, licet non semper visibiliter.

Nempe ut flamma intensa alba & unicolor adparet, eadem si per nebulam aut aliud densum corpus spectetur, varios induit colores; pari quoque ratione lux licet invisibilis aut alba, ut sic dicam, si per prisma vitreum, aut per aërem roridum transeat, similiter varios induit colores.

Quod igitur in luce pura nulli compareant colores, id minime obstat quominus illi revera insint lumini. Nempe ut major lux officit minori, ita quoque lumen purum impedimento est ut videatur lumen offuscatum. Omnem tamen lucem secum colores deferre ex eo colligi potest, quod si per lentem vitream, aut etiam per foramen, lumen in obscurum admittatur cubiculum, in muro aut linteo remotiore manifeste omnes videantur colores, cum tamen in punctis decussationis radiorum & locis nimium lenti vicinis, nullus color, sed purum tantum compareat lumen.

Jam vero ut lumen est forma & imago ignis, extra ignem quaquaversum radians, ita quoque colores qui à lumine deferuntur, sunt formæ & imagines colorum qui vere & materialiter insunt in illo igne à quo lumen spargitur.

Uti flamma & ignis quanto est debilior tanto debilius spargit lumen, similiter ad legem & proportionem veri & materiati coloris, qui est in flamma, crescunt & de-

decreſcunt etiam colores adparentes in lumine.

Quemadmodum deficiente flamma debilitatur lumen, ita etiam deficiente colore vero, evaneſcit quoque color adparens. Noctu itaque aut in tenui lumine nulli à priſmate vitreo ſparguntur colores, nulla phænomena colorata, irides lunares pallidæ, nihil rutilum aut alio colore conſpicuo tinctum uſpiam comparet.

Item uti flamma nulla vel nigra vel alba eſt penitus, ita quoque nulli colores adparentes albi ſunt vel nigri, ſed ut in flammis, ita quoque in lumine pallidus & cæruleus colores terminos conſtituunt.

Satis, niſi fallor, hinc patet quid ſit color verus & permanens ſeu fixus, quid item color fluidus ſeu inſtabilis, quem & adparentem nominant. Color nempe verus eſt gradus & modus combuſtionis in corpore aliquo; color vero adparens eſt imago veri coloris extra locum viſa. Quomodocunque vero componantur & conſerantur veri colores cum adparentibus, ſemper ut cauſa ad cauſam, ſic quoque erunt effectus ad effectus, & quod coloribus fixis, idem quoque imaginibus, quæ ab his formantur, eveniet. Quod ſi aliquanto hæc non ſibi conſtat ratio, id contingit propter ſitum & figuram corporum per quæ imagines feruntur & propagantur.

C A P U T XXVIII.

Carteſii de coloribus opinio rejicitur, & priſmatum vitreorum ratio oſtenditur.

NEqueo vero ſatis mirari quid animi fuerit Carteſio ac nonnullis aliis, ut negarent colorum alios eſſe veros alios autem adparentes. Ratio quamobrem ſic ſentiant, hæc eſt, *quod cum genuina & ſola colorum na-*

tura sit adparere, contradictio esse videatur, illos adparentes & tamen falsos esse dicere. Verum hæc opinio consistere non potest, nisi velimus aut absurda dicere, aut in vocabulo ludere, & pertendere æque veros esse colores, qui in speculis videntur, ac sint in illis subjectis, unde istæ imagines procedunt. Si nulli colores essent veri, utique nulli essent adparētes. Rei non existentis nulla pōtest existere imago. Intellectui vero adversatur ut omnes colores sint apparentes. Ad rem non facit quod colores qui à prismatico crySTALLINO projiciuntur, adpareant quoque in speculis, ostendimus enim colores istos non è nihilo in prismatico generari, sed esse adventitios & propagari à luce cui invisibiliter insunt. Nihil itaque confici potest hoc argumento, nisi istud, dari etiam imagines imaginum.

Ipsam vero colorum generationem quod adinet, talis est apud Cartesium, ut quamvis multa supponat quæ non sunt & fieri nequeunt, incertiorē tamen & magis indeterminatam colorum relinquat naturam, quam fecerint ii qui ignorantiam suam hac in parte palam sunt professi. Isti globuli & iste globulorum motus, & ista vitri porositas, gratis finguntur, nec vel ratione vel oculis & experientia firmari aut adstrui possunt. Tot globuli non superne tantum, sed & dextra, sinistra, & undique se mutuo contingentes & vitrum permeantes consistere simul non possunt, nisi ubique sint pori; quod si sit, jam vitrum non verum, sed imaginarium erit. corpus: nam si ubique sunt pori, ergo nusquam est vitrum. Quod si singuli globuli & singula corpuscula singulos ingrediantur poros, corruiat lateralis iste globulorum contactus, cui tamen soli naturam & originem colorum adscribit. Ut itaque transitus pateat imaginariis corpusculis

sculis quæ vitrum penetrare dicuntur, aut dissolvendus est iste globulorum nexus, aut statuendum vitrum non esse corpus.

Sed neque recte philosophatur cum causam utriusque iridis reddere conatur ex prismate crystallino. Quare enim color rubeus per tenuiores prismatis partes transire videatur, quando radii solis in charta excipiuntur, contrarium vero contingat si loco chartæ oculos crystallo opponamus, hujus quidem rei quamvis rationem adferre conetur, nullam tamen adfert. Primo in eo errat quod putet radios colorem transmittentes decussari antequam trigonum contingant. Siqui enim radii ante contactum trigoni decussantur, illi non penetrant aut saltem ad oculos non perveniunt. Decussatio illa fieri deberet in ipso demum vitro. Status vero quæstionis aliter est concipiendus, quæritur nempe unde fiat quod cum radii vel ad solis, vel ad candelæ lumen per prisma transmissi charta aut linteo excipiuntur, rubeus color videatur per tenuiores prismatis partes promanare, cœruleus vero per partes basi viciniore, cum tamen contrarium eveniat si oculum chartæ loco vitro opposueris, tunc enim cœruleus color adparebit ad partes vitri tenuiores, rubeus vero ad crassiores.

Nimirum hujus rei causa eadem est, atque sit illa quæ efficit ut in cubiculo clauso per angustum foramen omnes imagines decussatæ in pariete adpareant, cum oculis omnia videat erecta. Item quod sol per tubum opticum in chartam immissus adpareat eversus, cum tamen oculus eum videat erectum. Quippe quod chartæ id ipsum quoque contingit retinæ cum species visibiles inverso ordine ab oculo excipiuntur, quæ tamen à sensu judicante in vero apprehenduntur situ.

Quod autem scribit rubrum colorem per prisma manantem semper spectari ad partem prismatis tenuiorem, nec id quoque semper verum est. Teneas chartam aut digitum sic, ut pars una à sole illustretur, altera vero portio in umbroso sit loco. Si prisma oculis adplices, & chartam aut digitum contemplare, videbis contrarium colorum situm. Si enim pars illustrata superne rubeat, tunc pars in umbra delitescens cœruleum superne induet colorem. Et contra si hæc cœruleo, illa rubro colore tincta spectabitur.

Sciendum enim quod cum radii lucis sive visus ex majori luce ad lucem minorem per prisma feruntur, tum rubeus color transit per partes angulo prismatis viciniore. Quando vero radii à minori luce ad majorem vergunt, tum color cœruleus est acumini prismatis vicinior, rubeus vero remotior. Teneas digitum seu aliud objectum visibile in loco ubi à radiis solis illustretur. Si per prisma crystallinum digitum contempleris, cœruleus color fuerit à parte vicina angulo, basi vero propior adparebit color rubeus. At vero si digitum in obscurum & umbrosum locum transferas, aut eum contra solem statuas & illum sic obscuratum è lucidiore loco intueare, jam colores contrario procedent ordine.

Atque hæc quidem sola ratio sufficit ad omnes fere prismatis crystallini proprietates explicandas. Sed & ratio physica in promptu est quamobrem pro ratione majoris vel minoris luminis sibi invicem permisceantur & permutentur colores per prisma spectati. Quamvis enim lucidi & obscuri colores per singula puncta & æque per partes acumini quam basi prismatis vicinas propagentur, semper tamen id ea, quam explicuimus, ratione contingit. Jam vero si quis vitrum tenue soli aut luci ob-

obvertat, nullus fere splendor in eo adparebit, propterea quod radii propter materiæ resistentis paucitatem facile eluctantur. At vero si crassius vitrum soli opponatur, minus quidem lucis ad oculos remittetur, plus tamen lucis in ipso comparebit vitro, quia propter materiæ densitatem radii detinentur, & plura puncta illustrant. Eadem est ratio prismatum. Lux quia facilius penetrat tenuiores vitri partes, majus lumen seu lucidum magis colorem per tenuiores vitri partes remittit. Contra vero oculus minus lucis, & lucidum minus colorem cernit in parte prismatis tenuiore, plus vero lucis & vividos magis colores conspiciit ubi densius est vitri corpus.

Si quis vero quærat unde fiat quod in cubiculo clauso per foramen species inversæ in chartam deferantur, cum oculus loco chartæ positus omnia videat erecta, sciat is licet aliter eadem tamen hoc ratione contingere. Radii enim decussati eoque imbecilliores, illi sunt qui colorem advehunt. At vero radii qui ab oculis lucem versus feruntur, illi recta & propemodum paralleli procedunt. Quamvis vero etiam istis insunt species coloratæ, ex tamen à majori luce obruuntur & invisibiles fiunt. Lux colores exstinguit. Major lux obruit & tollit minorem. Radii recti & perpendiculares, cum fortiores, sint, vincunt & invisibiles faciunt radios obliquos & decussatos.

C A P U T XXIX.

*Ejusdem ratio coronarum circa lucernas improbat
ac vera ostenditur.*


QUæ porro promit argumenta idem Cartesius ad probandam suam de productione colorum sententiam, eodem omnino recidunt, nempe ad rotationem materiæ subtilis, è cujus motu totam colorum originem explicari posse existimat. Utcunque vero hunc motum admittere velimus, qui tamen nullâ vel ratione, vel experimento nititur, æque nihilominus incerta & indeterminata manet colorum natura. Et quidem maxime miror, quod cum similes adparitiones similes requirant causas, diversas tamen rationes reddere conatus sit colorum qui in iride, halone & coronis circa lucernas cernuntur. De aliis agemus in meteorologicis nostris, hic saltem de lucernarum coronis nonnihil dicemus. Quod itaque putat colores istos flammam ambientes provenire in ipso oculo, id omnino à ratione alienissimum est. Si hoc verum esset, jam semper & ubique oculo similiter affecto tales apparerent coronæ; atqui tamen illæ non videntur, nisi in aëre valde humido, unde fit ut à navigantibus potissimum conspiciantur, aut quando à mari flant venti, item in balneis. Quod autem rationem quam reddit, attinet, quare non semper videantur coronæ istæ lucernariæ, & cur non omnia objecta coloribus picta adpareant, ex ea nihil aliud confici potest, nisi hoc tantum, non videri semper, quia non semper videantur.

Sed vero quæ Irides aliaque colorata in aëre phænomena efficit causa, illa ipsa quoque lucernarios istos producit

ducit annulos. Cum nusquam nisi in humido cernantur aëre, utique ex hujus constitutione horum petenda est ratio. Vera esse quæ scribo vel inde liceat experiri, quod si vel simplex aliquod vitrum halitu humectes, & lucernæ à quocunque intervallo opponas, protinus lucerna annulo coronetur. Quod si priusquam halitu oris inficias vitrum aquæ frigida immerferis, multo etiamnum colorationes conspicias coronas.

Sed & è sphæris vitreis quando antliæ pneumaticæ beneficio aër exhauritur, si quis ex opposito sphæræ lucernam tenuerit, illo ipso temporis puncto quo aër in antliam delabitur corona circumcirca lucernam comparebit. Aër enim vi magna decidens & latera vitri toto suo pondere vehementer adspargens idem quod oris halitus, & quidem efficacius efficit.


Quod vero nonnunquam duplex adpareat corona, id non alias contingit, quam cum alter oculus imbecillior est altero. Esto lucerna in A oculi vero in O. Si aër non multo humore sit infectus, tunc nullæ quidem



circa lucernas comparent coronæ, aliquanto tamen majores & propiores visuntur lucernarum flammæ, cum nullus aër tam sit tenuis, ut non aliquam saltem causet refractionem. Flamma itaque A oculo O adparebit in BC,

BC, ideoque quod radii adscititii contingant flammam veram, nullus in medio comparet hiatus, si tamen accurate attendas, & paulo longius abstiteris, nigrior quædam macula in medio lucernæ comparebit, quod manifestum signum est flammæ jam incipientis deliscere.

At vero si densior & aquosior fuerit aër, major necessario fit refraction, ac tum species major propiorque adparebit, nempe in DE, videbiturque à quolibet ocu-



lo constituto in O per radios DO & EO. Quod si alter oculus, aut incubatu, aut alio modo læsus vel luxatus fuerit, tum lumen A propius etiamnum & majus spectabitur, scilicet in FG, contingeretque oculum O per radios FO & GO.

Causa vero quamobrem majores hæ coronæ in medio sint pellucidæ & nullo colore tinctæ, satis est manifesta ex iis quæ paulo ante diximus. Cum enim major lux tollat & perimat minorem, fieri aliter non potest, quin radii qui recta ab oculis ad lucem tendunt, tollant colorem per quem solum species sunt visibiles.

At vero si operiatur A lucerna & oculus transferatur in H, jam contraria omnia evenient. Integra enim lucerna in densissimo illo aëre, tanquam speculo obscuro, comparebit in DEI aut in FGK, & quidem media
pars

pars adparentis flammæ DE aut FG erit lucidissima, exterior vero limbus obscurior, coloresque, si qui videri possint, contrario ordine exhibebit.

Quod autem colorum ratio contraria sit in coronis atque in iride, & hujus quoque rei causa, ut puto, jam patet. Cum iridem in cœlo spectamus tum radii lucis & visus in averfam à sole partem tendunt & à majori luce ad minorem feruntur. At vero cum à minori luce ad majorem radii tendunt, uti fit in coronis, tum, ut diximus, invertitur colorum ordo.

C A P U T XXX.

Stabilitur opticornum sententia, cum dicunt corporum adparentium magnitudines esse angulo visionis proportionales, & notantur errores Cartesii.

NON minus errat idem Cartesius in cæteris lucis & visus proprietatibus explicandis, dum in ipso oculo quærit ea quæ certis documentis foris contingere ostendi potest, ac cum negat veram esse opticornum regulam, cum dicunt adparentes corporum magnitudines angulo visionis esse proportionales. Hoc optices statutum exinde destruere conatur, quod sol & luna majores videantur horizonti propinqui, quam ab eo remoti. Atqui tamen inquit astronomis quando instrumentis horum siderum magnitudinem metiuntur, sub eodem semper adparent angulo, sive horizonti incumbant, sive vertici immineant. Sed profecto graviter errat. Ponamus enim latitudinem Solis humilis & sublimis sub æquali fere angulo & mensura colligi si quis instrumentis utatur, longe tamen alia hujus rei est ratio, quam ipse existimet. Quod Sol & luna horizonti vicini majores adparent,

K

non

non hoc contingit ex phantasia, id quippe si esset, non semper & non omnium oculi similiter adficerentur, sed ex eo quod Solis lunæque species in majori aëris portione latius se explicant. Jam vero si quis per minuta dioptræ foramina sidera hæc, vel orientia, vel occidentia contempletur, auferuntur & amputantur radii adventitii qui in vicino oculis aëre majorem horum siderum speciem efficiunt. Verum esse quod adfirmo, id ex eo certo colligi potest, quod si quis per tabellam aut chartulam nigram acu perforatam conspiciat Solem, lunam, aut etiam lucernam, illico triplo, quadruplo, aliquando etiam decuplo minores compareant. Lucerna eminus visa pedali nonnunquam comparet magnitudine, cum tamen per angustum visa foramen, minima repente fiat. Abraduntur enim radii spiritui, licet non omnes, majori tamen ex parte ac soli fortiores, qui ab ipso corpore luminoso procedunt, ad oculos per angustias eluctantur.

Sed neque ea succedit ratio qua ostendere vult, quare alba & lucida objecta majora & propiora adpareant quam revera sint. Et hujus quoque rei causam ex fundo oculi & ex capillamentis nervi optici eruere conatur, nihilo felicius quam cætera. Si enim luminis intensio efficiat, ut majores in retina imagines formentur, utique necesse est, ut à vicino lumine majores in oculo formentur species quam à remoto. Atqui contrarium contingit. Lucernæ eminus visæ habita ratione distantiae, majores adparent quam prope. Flumina & maria qua solares excipiunt radios, quanto à majori intervallo cernuntur, tanto altior adparet eorum superficies. Sol & reliqua sidera quanto major est intermedii aëris moles, tanto majori corporis ambitu se videnda exhibent.

hibent. Omnia denique lucida, quanto densius est diaphanum, per quod spectantur, tanto ampliora se oculis offerunt. Adeone quis mentis inops ut putet aliis nos oculis contemplari solem orientem vel occidentem, aliis vero altius provectum? Cum tam manifeste promensura & ratione intercedentis aëris crescant & decrescant eminus visa objecta possitne aliquis ultra dubitare quænam sit causa hujus phænomeni?

Verum quo magis cognoscatur hic error, in quem impeerunt etiam alii ante Cartesium, quum putarunt ex contractione pupillæ seu uveæ tunicæ provenire, ut res eadem modo majores modo minores adpareant, hoc quoque addo, sive constringatur, sive laxetur pupilla, quorumvis tamen objectorum visibilium speciem pari magnitudine & ambitu in retinam adpellere. Cum enim illis ipsis agnoscentibus imagines in oculum per pupillam admittantur eodem prorsus modo, atque in cubiculum tenebricosum per foramen, ipsum hoc quod adfirmamus, necessario sequitur. Sive enim patulum, sive angustum fuerit cubiculi foramen, æquali tamen magnitudine objecta quævis in opposito linteo seu pariete depinguntur. Si per simplex duntaxat foramen radii in cubiculum influant, constringendo seu dilatando foramen, efficere quidem possis, ut imagines plus minusve offuscentur, nunquam tamen efficies ut minus spatii in linteo occupent. Ipsa enim ratio & experientia docent, in unoquoque foraminis puncto decussari integram totius objecti speciem, ita ut unumquodque punctum, tam in pupilla quam in foramine cubiculi, constituat communem verticem duarum pyramidum, quarum una est externa, cujus basis est objectum radians, altera interna, cujus basis est in linteo for-

mini opposito, seu in retina oculi, in quibus omnia eversa repræsentantur.

Jam vero cum causam assignare conatur, quamobrem corpora exilia aut valde remota, cujuscunque demum sint formæ, eminus visa rotunda adpareant, nec tum quoque recte philosophatur. Hujus rei causam ex prædictis rationibus petendam esse existimat. Addit tamen & alteram nimirum quod nulla corpora, quæ parvas in oculo formant effigies, figuram angulorum suorum exprimere valeant. De priori argumento jam diximus. Altera ratio licet à veteribus agnita, & prima fronte vera videatur, neutiquam tamen probandam censeo. Exilia enim corpora si valde remota fuerint, non videntur. Si tamen contingat ut ea cernamus, comparebunt hæc non in suo loco, sed aliquanto propius, in ipso nempe aëre refracte spectabuntur. Quia vero omne corpus, vel sua sponte lucidum, vel aliunde illustratum, cujuscunque demum figuræ sit, radios diffundit in orbem, necessario contingit, ut quamvis ipsum corpus non videamus, nihilominus sphaeram ejus radiosam in intermedio cernamus aëre. Quod si purus & tenuis fuerit aër, imago quidem aliquanto major & loco vero propior, non tamen tam magna & oculis vicina spectabitur, quam si densior fuerit aëris constitutio. Hinc patet quare Venus corniculata, rotunda videatur. Item quare halones lunæ corniculatæ, æque rotundæ sint ac halones lunæ plenæ; & quare cum flammæ lucernarum sint pyramidales, tamen coronæ ipsas ambientes circulares adpareant. Sed & hoc quoque patet quare halones & coronæ istæ aliquando minores & remotiores, aliquando vero majores & oculis viciniore videantur.

C A P U T XXXI.

*De diametro Solis & Luna & refractione siderum
in horizonte.*

DE instrumentis vero quod dicitur, illa æquali semper mensura solis diametrum repræsentare, id licet aliquando, non tamen semper verum est. Quamvis solis diametrum, etiam cum in perigeo est, alii non majorem faciant min. 34. Ricciolus tamen hunc sæpius min. 45, imo etiam integri gradus diametro sibi visum adfirmat. Quin & majori angulo conspicietur, si quis non per angusta foramina sed per directas regulas aut puncta nigro notata, latitudinem ejus exploraverit, & posthabita umbrarum ratione solis oculis extremitates adparentis solis annotare operæpretium censuerit.

Nectantum sol oriens vel occidens, sed & alte pro-
vectus, & in ipso quoque meridiano visus, tantæ sæpe
compareret amplitudinis, si per aërem nebulosum spec-
tetur.

Facile hinc conjici potest undenam proficiscatur ea
discrepantia quæ tam multos hætenus exercuit astrono-
mos & geometras, dum solis lunæque diametros ac alio-
rum quoque siderum ortus & occasus instrumentis suis
metiri & assequi conati fuere. Præterquam enim quod
non satis magnam refractionis, habuere rationem, etiam
hoc accedit, quod dum aliis aliisque ad veritatem inda-
gandam utuntur instrumentis, non satis adtenderunt,
pro horum diversitate diversa quoque magnitudine &
dissimili situ quorumvis objectorum speciem ad oculos
pervenire. De refractione quæ solis oculis observari
potest, satis, ut puto, jam olim diximus. Nunc saltem

prius quam finem hinc opusculo imponamus, aliquid subjungemus de ea refractione quæ fit circa instrumenta. Quamvis itaque, ut ex prædictis patet, multo accuratius siderum magnitudines & intervalla haberi possint astrolabio aut simili instrumento, quo radii per minuta foramina admittuntur, quam nudis oculis, aut etiam baculo Jacobi; ne hic tamen metiendi modus omni prorsus caret vitio. Licet enim propter foraminum angustiam amputentur radii nothi, qui in vicino oculis aëre quælibet objecta amplificant, non tamen omnino tolluntur illi radii, qui à remotiori adveniunt aëre, quique & ipsi sunt spurii. Quancunque enim superest aëris portio, aliquam efficiat refractionem necesse est. Tychonis Dani instrumenta quin accuratissima fuerint nullus dubito. Solis refractioni circa horizontem adsignat hic minuta 34. Sane qualiacunque fabricentur instrumenta nunquam tamen fient talia quæ omnem prorsus tollant refractionem, & solos è centro solis affluentes radios in recta deferant linea.

Attamen, quod etiam alibi monuimus, non satis consistit hic Tychonis calculus, cum non tantum pro diversitate instrumentorum, sed & pro temporis & loci ratione dispar quoque sit refractionum mensura. Crebra experimenta terra marique facta docent solem sereno cælo videri cum duobus integris gradibus infra horizontem latet. Quod si quis experimento id ipsum probari velit, abunde id præstabit vel baculus Jacobi dictus. Si enim in horizontem baculum hunc accurate dirigas, jam oportet ut tignum transversum, quod ad angulos rectos baculo inequitat, centro terræ ad perpendicularum immincat, & gradum nonagesimum exacte teneat. Atqui tamen hoc non contingit, sed transito gradu

du 90, duobus gradibus oculo vicinior fit apex superior. Patet ergo nec ipsum baculum parallelum esse ad planum horizontis, sed ab anteriori parte duobus gradibus supra horizontem elevari, ab altera vero parte totidem gradibus infra horizontem deprimi.

C A P U T XXXII.

Novum refractionis genus, quod fingunt nonnulli, expeditur, & vera cometarum ratio explicatur.

PRæter autem illa quæ jam recensuimus commenta, aliud quoque memoratur refractionis genus, ignotum cæteris opticis, quodque in solo reperiri dicunt æthere, & quidem in spatio supra Saturnum, ubi scilicet minores; ut dicunt, globuli à majoribus terminantur. Ut Cometarum reddatur ratio, novam hanc refractionis normam introducere conantur, quamvis & naturæ & omnibus refragetur experientiis. Non foret difficile clarissime id ipsum ostendere, sed si Cometarum hypostasim & constitutionem, nec ab illis, nec à quoquam hæctenus satis intellectam explicuero, corruent, ut puto, omnes eæ rationes, quæ illos inducere ut novas naturæ conderent leges. Animus fuerat alibi cometarum historiam tradere, nonnulla tamen & hic præfabimur.


Est itaque cometa non phantasticum aut imaginarium aliquod spectrum, sed verum corpus & verum sidus quaquaversum accensum. Errant qui putant ab uno saltem latere ardere & flammantem projicere comam. Undique uritur cometa, undique ignem, vaporem & radios in orbem quam latissime ejaculatur: sed quia in parte, quæ solem respicit, à majori lumine obruitur & extinguitur cometæ fulgor, ideo in parte tantum umbrosa,
quæ

quæ averſa eſt à ſole , igneum iſtud adparet capillitium. Sive auroræ, ſive crepuſculi tempore , ſive etiam media nocte ſidus hoc contemplere , ſemper alio alioque ſitu coma hæc ſe videndam exhibet , ita tamen ut ſemper quam exactiſſime à ſole averſa ſit , moveaturque pro ratione radiorum incidentium , ſintque in eadem recta linea , ſol , caput cometæ , & cauda ejus ut vocant. Ex hac variatione certum ſumitur indicium cometam undique ardere & undique ſpargere halitus accenſos , qui illuſtrati à ſole inviſibiles ſiant , non vero illuſtrati , tum demum clareſcant & ſiant viſibiles. Quod nempe montibus ignivomis , idem quoque cometarum contingit incendio. Interdium , vel nunquam , vel certe quam rariſſime adparent montium flammæ , quin potius tenebras & noctem offundunt : ſole occaſo , tum demum coruſcant , & cælum undique collucet. Nos ipſi non ſemel vidimus id genus incendia , quæ interdium nebulæ , noctu vero flammæ inſtar comparebant , illo plane modo quo cæleſtis columna , quæ in mari rubro Iſraëlitis viam præmonſtrabat.

Quamvis ipſius comæ motus , ad ſingula allabentis lucis momenta ſe conformans , manifeſtum hujus veritatis præbeat argumentum , attamen obijciunt nonnulli ipſius cometæ figuram , quæ paulatim latius latiusque explicatur. Umbram vero cometæ inquiunt debere in mucronem coire , cum corpus cometæ longe minus ſit corpore ſolari.

Sed vero qui ſic exiſtimant , graviter errant , nec ſatis intelligunt umbrarum rationem. Nullum quippe corpus eſt quantumvis magnum , ſive etiam quantumvis exiguum quod non infinitas ſpargat umbras. Verum quidem eſt ex circumferentia ſolis progredi radios qui
um-

umbram faciant desinentem in conum, sed cum ex omni solis puncto ad omne punctum ferantur radii, necessarium quoque est, ut ab eodem extremo solis ambitu exeant radii, qui ut in quodlibet aliud corpus, ita quoque in caput cometæ impingant. Quia vero omnis lux terminata umbram post se facit, necessario sequitur ut in averfa cometæ parte fiat lucis diminutio, umbraque relinquatur, quæ non ut altera illa interior & nigrior in metam coeat, sed quæ dilutior sit multo, quæque quanto longius fertur, tanto latius expandatur. Esto cometa AB, in quam incidant radii solis CA & DB,



& progrediantur usque in E, manifeste ab his terminabitur contus umbrosus AEB, & hæc quidem est angustissima umbra: latissima vero terminabitur à radiis indidem quidem ortis, sed decussatis, quales sunt CBG & DAF. Hi formant & includunt umbram καλα-
 ϑειδῆ, sive conum inversum & apice truncatum AFGB.
 In hoc vero spatio solus est conus AEB, ad quem
 L nulli

nulli solis radii perveniunt. Reliqua vero hujus spatii portio, partem radiorum admittit, partem vero excludit, itaque ibi est umbra dubia, sive umbra cum luce permixta.


Quamvis vero nesciam an alii qui de luce scripsere, duplicis hujus umbræ fecerint mentionem, non ideo tamen minus vera esse quæ scribimus libenter, ut puto, fatebitur, si quis vel digiti, vel cujuscunque alius corpusculi umbram ad solem, vel lucernam examinaverit. Discrepantes quidem fient umbræ pro ratione intervalli, & magnitudine corporis lucentis, & interpositi opaci, semper tamen id ea quam explicuimus lege continget, adparebitque semper umbra duplex, una interior & ubique sibi similis, altera mixta & paulatim imbecillior, sic tamen, ut & hujus quoque terminus manifeste compareat.

Sed & ipsa cometæ coma manifestum hujus rei facit indicium. Qui enim de cometis scripsere, observarunt in medio comæ instar medullæ longam aliquam excurrere tæniam, quæ reliqua coma multo sit lucidior. Nempe conus interior, quem non contingunt radii solares, quanto obscurior, tanto quoque vividius lumen spargit.

Latitudinem comæ quod adtinet, illa pro mensura capitis magna possit videri, cum ad tres nonnunquam gradus explicetur, si quis tamen accuratam ineat rationem, inveniatur & hujus quoque proportio corpori analoga. Notandum enim umbram averſæ partis ex eo majorem videri, quod solis radii non possint penetrare partes capiti cometæ vicinas, quia illæ densis flammis & halitibus undique ambiuntur. Sed & altera præcipua est ratio quæ comæ magnitudinem intendit, illa
nempe

nempe de qua superius diximus, quod omnia lucida eminus visa sub majori angulo compareant. In vapore enim ambiente caput cometæ flamma & accensus vapor quoad speciem dilatantur.

Porro quod nonnunquam curva adpareat hæc coma, & hujus quoque rei manifesta est ratio. Nempe & hoc ex ambiente cometam vapore contingit. Estò cometæ verus locus ad A cujus coma extendatur usque in B. Secundum ea, quæ diximus, oculo in C constituto, caput cometæ aliquanto vicinius adparebit, nempe in D.



Jam vero cum & cometæ, & comæ adparentis eadem sit ratio, necessario eveniet ut quæ sit proportio AC ad DC, eadem quoque sit proportio EC ad FC, & GC ad HC, & denique BC ad IC. Si itaque curvam duxeris lineam quæ transeat per puncta DFHI, illa erit apparentis comæ directio. Atque hæc quidem

sola est causa quamobrem cometarum cauda nonnunquam sinuosa adpareat. Semper vero id ipsum contingit cum ex obliquo cometa spectatur. At vero cum oculus, caput cometæ & capillitii extremitas in eodem sunt verticali circulo, tum necessario recta adparet coma. Non difficile nobis esset etiam alias cometarum formas, quæ à scriptoribus memorantur, hic explicare, & ostendere ex sola aspectuum diversitate contingere, quod tam multiplici facie sidus hoc se videndum præbeat; sed tractationem hanc alteri loco reservamus. Hæc ad præsens institutum sufficere arbitror, & simul ad convincendam eorum opinionem qui cometas perforatos finxere, ac non in orbem flammam & vaporem jaculantes, sed in partem saltem à sole aversam. Undique enim, ut diximus, ardet cometa, & si sol obtegi posset, quam prolixa est cometæ cauda, tanta undique flamma cerneretur. Cum olim ardebit hæc quam habitamus machina, & ipsa quoque fiet cometa, eodemque prorsus spectabitur modo ab aliorum siderum incolis, ac à nobis spectantur cometæ.

Leve vero est quod nonnulli ex comæ pelluciditate obtendunt argumentum. Quia enim per hanc comam stellæ adpareant, ideo negant flammam esse, utpote quæ non sint pellucidæ. Sed vero neque nos statuimus universum illum vaporem, quo cometæ ambiuntur, esse accensum. Viciniores tantum sunt partes quæ ardeant. Qui longius à capite cometæ efferuntur vapores, illi, si cominus viderentur, non essent rubicundi. Idem nempe his contingit quod focus vitrariis aliisque quotidianis ignibus, qui è propinquo spectari, longe minores nutriunt flammam, quam si vel noctu, vel ominus spectentur. Tum quippe flammam ambiens vapor flammam naturam & speciem induit.

Et

Et tamen etiamsi concesserimus accensos esse istos halitus qui immensum adeo occupant spatium, astra nihilominus pellucerent. Licet enim opacæ sint flammæ quantumvis minutæ, alias enim non essent visibiles, si tamen ultra has aliud lucidius succedat corpus, illico fiunt transparentes. Sic carbones, sic ellychnia probe accensa per flammæ cernuntur, & quod semper, id ipsum quoque hic evenit, ut major lux destruat minorem, & quæ alias opaca videntur, ea ipsa majoris præsentia luminis fiant pellucida.

Plura de cometis dicenda supererant, sed hæc pauca nunc prælibasse sufficiat. Dum lucis naturam & accidentia explicare conamur, visa nobis fuere etiam istæc non aliena ab instituto. Quod si quis aliter judicet, is suo fruatur arbitrio, mihi ne sit invidiosum nostram exposuisse sententiam, donec certioribus experimentis, aut sublimium ingeniorum accuratiore indagine hæc ipsa clarius patefiant.

F I N I S.

L 3

I N-

I N D E X

C A P I T U M.

Cap. I.	C ausam & subjectum lucis esse ignem.	Pag. 1
II.	Ignem non esse corpus.	2
III.	Quid sit lux.	4
IV.	Exponitur & examinatur Cartesii de luce opinio.	5
V.	Gassendi opinio exponitur.	8
VI.	Vitrum, aquam & eximie pellucida corpora carere poris, & quomodo pori generentur.	11
VII.	Radios lucis non esse corporeos.	13
VIII.	Lucis motus in vacuo.	16
IX.	Ostenditur dari vacuum.	17
X.	Solvuntur argumenta vacuum oppugnantium.	20
XI.	Aëris altitudo ostenditur.	25
XII.	Supra aërem esse vacuum, frustra ibi aliud quæri cor- pus.	26
XIII.	Qualis sit lucis motus in vacuo.	28
XIV.	Quid luci contingat in ingressu corporum.	31
XV.	Refractionem non fieri in superficie.	33
XVI.	Refractionem fieri etiam in perpendiculari.	35
XVII.	Quomodo fiat refraction, & qua proportione.	38
XVIII.	Solis & montium refraction quomodo fiat.	39
XIX.	Refraction in luna, & mensura montium lunarium.	45
XX.	Vera refractionis causa explicatur.	50
XXI.	Quare radii oblique in aliquod corpus parallelepipedum incidentes in ingressu & egressu paralleli sint.	54
XXII.	Quo pacto radii afficiantur in ingressu & egressu sphaerico- rum corporum.	56
XXIII.	Omnia corpora simplicia esse pellucida.	58
XXIV.	Colores non esse lumen, & unde oriantur.	59
XXV.	Colorum materiam esse à qualitate sulphuris.	60
XXVI.	Ordo colorum.	61
	XXVII.	

- XXVII. *Quomodo colores apparentes generentur.* 63
- XXVIII. *Cartesii de coloribus opinio rejicitur, & prismatum vitreorum ratio ostenditur.* 65
- XXIX. *Ejusdem ratio coronarum circa lucernas improbat; ac vera ostenditur.* 70
- XXX. *Stabilitur optidorum sententia, cum dicunt corporum adparentium magnitudines esse angulo visionis proportionales; & notantur errores Cartesii.* 73
- XXXI. *De diametro Solis & Luna, & refractione siderum in horizonte.* 77
- XXXII. *Novum refractionis genus, quod fingunt nonnulli, exploditur, & vera cometarum ratio explicatur.* 79



I N D E X

C A P I T U M.

Cap. I.	C	<i>Ausam & subjectum lucis esse ignem.</i>	Pag. 1
II.		<i>Ignem non esse corpus.</i>	2
III.		<i>Quid sit lux.</i>	4
IV.		<i>Exponitur & examinatur Cartesii de luce opinio.</i>	5
V.		<i>Gassendi opinio exponitur.</i>	8
VI.		<i>Vitrum, aquam & eximie pellucida corpora carere poris, & quomodo pori generentur.</i>	11
VII.		<i>Radios lucis non esse corporeos.</i>	13
VIII.		<i>Lucis motus in vacuo.</i>	16
IX.		<i>Ostenditur dari vacuum.</i>	17
X.		<i>Solvuntur argumenta vacuum oppugnantium.</i>	20
XI.		<i>Aëris altitudo ostenditur.</i>	25
XII.		<i>Supra aërem esse vacuum, frustra que ibi aliud quari cor- pus.</i>	26
XIII.		<i>Qualis sit lucis motus in vacuo.</i>	28
XIV.		<i>Quid luci contingat in ingressu corporum.</i>	31
XV.		<i>Refractionem non fieri in superficie.</i>	33
XVI.		<i>Refractionem fieri etiam in perpendiculari.</i>	35
XVII.		<i>Quomodo fiat refraction, & qua proportionem.</i>	38
XVIII.		<i>Solus & montium refraction quomodo fiat.</i>	39
XIX.		<i>Refraction in luna, & mensura montium lunarium.</i>	45
XX.		<i>Vera refractionis causa explicatur.</i>	50
XXI.		<i>Quare radii oblique in aliquod corpus parallelepipedum incidentes in ingressu & egressu paralleli sint.</i>	54
XXII.		<i>Quo pacto radii afficiantur in ingressu & egressu sphaerico- rum corporum.</i>	56
XXIII.		<i>Omnia corpora simplicia esse pellucida.</i>	58
XXIV.		<i>Colores non esse lumen, & unde oriantur.</i>	59
XXV.		<i>Colorum materiam esse à qualitate sulphuris.</i>	60
XXVI.		<i>Ordo colorum.</i>	61
			XXVII.